

東  
華  
續  
錄

光緒一百六十九

臣朱壽朋敬編

臣張毓英恭校

八月甲午朔諭朕欽奉 慈禧端佑康頤昭豫莊誠壽恭欽獻崇熙皇太后懿旨聞李鴻章現在患病尚未痊癒該大學士以時局多艱力疾從公不肯請假其見忠愛性成朝廷嘉許之餘益深思念著賞假二十日安心調理期早就痊以紓重系○諭朕奉 慈禧端佑康頤昭豫莊誠壽恭欽獻崇熙皇太后懿旨兵部左侍郎李昭煒等奏安徽大水請飭助賑一摺據稱安徽自五月起大雨連旬山洪暴漲同時泛溢圩堤衝塌甚多大江南北各府州縣田廬禾稼人口牲畜漂沒不知凡幾請迅速籌濟等語安徽此次被水災區較廣前據王之春奏陳當經諭令妥籌賑濟深宮軫念災黎實深憫惻著頒發內帑銀五萬兩交王之春核實散給並著察看全省分別輕重迅即多方賑撫毋任一夫失所○乙未諭人才為政事之本作育人才端在修明學術歷代以來學校之隆替以躬行道藝為重故其時體用兼備人才衆多近日士子或空疏無用或浮薄不實如欲革除此弊自非敬教勸學無由感發興起除京師已設大學堂應行切實整頓外著各省所有書院於省城均改設大學堂各府及直隸州均改設中學堂各州縣均改設小學

堂並多設蒙養學堂其教法當以四書五經綱常大義為主以歷代史鑑及中外政治藝學爲輔務使心術純正文行交修博通時務講求實學庶幾植基立本成德達材用副朕圖治作人之至意著各該督撫學政切實通飭認真興辦所有禮延師長安定教規及學生畢業應如何選舉鼓勵一切詳細章程著政務處咨行各省悉心酌議會同禮部覆核具奏將此通諭知之○丁酉諭軍機大臣等世續等奏祀典重地防守喫緊請妥籌巡防一摺著全權大臣暨留京王大臣轉飭各該衙門添派弁兵加意防範勿稍疏虞○諭張之洞奏出洋華商表明心跡請准銷案免究並予褒獎一摺據稱福建舉人內閣中書銜邱煒葵向在南洋新嘉坡一帶經商素爲華商之望上年唐才常在漢口破案供有邱煒葵伙助該逆錢財之語經該督通緝拿獲據該舉人稟稱初與康梁二逆往還嗣聞其藉端斂財煽黨謀逆立即痛恨絕交冤被株連懇予自新奏明銷案免究並報効賑捐銀一萬兩等語康梁二逆遁逃海外煽惑人心藉會斂財似此被其誑誘者必所不免既據該舉人輸誠悔悟具見天良殊堪嘉尚邱煒葵著加恩賞給主事並加四品銜准其銷案以爲去逆效順者勸○奏勸李鴻章電致行在軍機處升任府尹河南藩司陳曉龍前經臣等奏請留京數月奉 旨俟張仁黼到後再赴新任現查府尹已簡陳曉龍該藩司承修 踴躍經由之地關係緊要可否仍遵前 旨飭陳曉龍馳赴新任之處理合請 旨遵行所代奏軍機大臣奉

旨陳夔龍著留辦鐵路工程俟報竣後再行請旨○以王丕雄爲山西大同鎮總兵○戊戌諭造就人才實係當今急務前據江南北四川等省選派學生出洋肄業著各省督撫一律仿照辦理務擇心術端正文理明通之士遣往學習將一切專門藝學認真肄業竭力請求學成領有憑照回華卽由該督撫學政按其所學分門考驗如果學有成效卽行出具切實考語咨送外務部覆加考驗據實奏請獎勵其遊學經費著各直省妥籌撥給准其作正開銷如有自備旅費出洋遊學者著各該省督撫查明該出使大臣隨時照料如果學成得有優等憑照回華准照派出學生一體考驗獎勵候旨分別賞給進士舉人各項出身以備任用而資鼓舞將此通諭知之○己亥奕劻李鴻章電致 行在軍機處頃接醇王柏林江電港奉 命本爲德國專使自遞書後雖德皇款接優渥但因前節未免猶有介懷屢晤外部據稱除美日與彼無涉若往歐洲英意比有違專誠之旨該皇深不謂然收禮至今尙在游移未定遣今日前往丹溪閣大操五日可回柏林仍須看各廠院約計八月廿在德卽可竣事而意皇來信西十月十五後方能接待又接駐英羅使函稱英外部副侯云曾接駐京公使來電雖有敦請往游之意至今尙未奉有英廷敬迎之諭等語遣此番遠涉風濤到德後歷觀各廠精神勞頓飲食減少兼有水土不服之證務懇與駐京英意比公使設法託辭婉商萬勿宣示該外部阻行之意現擬德事畢後卽行前赴美日順道回國

以上各節均已函達羅使矣伏乞代奏請 旨示遵云 上諭軍機大臣等朕欽奉 懿旨載灃江甯覽悉此行本爲德國專使該親王現有水土不服之證飲食減少聞之深爲慮念在德使事既畢著卽啟程回華以慰遠系美日意比各國使事暫從緩議此時均毋庸前往○庚子戶部奏光緒二十七年七月二十九日奉 上諭朕欽奉 皇太后懿旨捐納職官本一時權宜之政近來捐輸益濫流弊滋多人品混濁仕途冗雜實爲吏治民生之害現在振興庶務亟應加意澄清嗣後無論何項事例均著不准報捐實官自降旨之日起卽行永遠停止統限一箇月內截數報部毋得奏請展限其虛銜封典翎枝貢監及現行常例准捐各項究竟有無妨礙著該部核議奏明辦理欽此欽遵由內閣鈔出到部等因伏查報捐實官既經奉 旨永遠停止凡各項花樣因捐納實官班次而設者均應一律停止不准再行報捐至虛銜封典貢監翎枝等項各省遇有水旱偏災多藉此項捐輸以資賑濟且與實官有別自不在應行停止之列第成數過減殊不足以示鄭重應令嗣後各省賑捐凡銜封貢監均以五成實銀上兌各項翎枝仍准按賑捐章程上兌惟必須收足數目不准私自折減倘或承辦人員再有暗中折減之弊卽由各該督撫查明從嚴參辦又四川津貼捐輸亦僅係銜封等項自應照舊辦理又現行常例准捐各項從前停止捐輸之年此項常捐均未奏明停止原以常捐各項多係就已實官人員量爲推廣與初捐實官並加

捐實官者均有不同尙屬無礙政體應請照常開辦統歸部庫按照籌餉定例銀數交納外省不准兌收  
又報効股票銀兩業經臣部奏明按照例定十成銀數請獎實官等項此係先行報効銀兩續經奉旨  
准給獎敘亦與現在報捐實官者不同仍請照案奏獎以昭大信惟查近年各省督撫往往因官紳報効  
鉅款奏明請旨從優獎勵此項人員名爲報効實與捐輸無異且一經特旨允准較尋常捐納之員  
班次更爲優異應令嗣後凡有報効鉅款奏請優獎之案須聲明報効銀兩較尋常例定有增無減並將  
款項全數解部聽候撥用無論何省概不准徑行截留以杜取巧而昭核實得旨如所議行○張之洞  
奏竊維周禮開卷大義曰辨方正位體國經野是知古聖人經世大端必自觀天文察地理始臣前於光  
緒二十七年二月十三日准前護陝西撫臣端方來電以內廷需用大清一統志泰垣徧查不得屬  
臣訪購呈進等因仰見我皇上眷懷寶宇孜孜求治之至意臣謹考是書於乾隆八年輯成者計三百  
五十六卷乾隆二十九年以後續行編輯者增爲五百卷本擬訪求殿本原書因鄂省徧訪未得並向  
蘇杭湖南等省於書肆及藏書家廣爲搜求均無其書僅在揚州購到排印大字本四百五十六卷者一  
部紙版尙屬完整其五百卷者各處藏書家無論殿本重刻本皆無其書祇有上海石印縮本字跡較  
小檢閱頗費目力未敢率行進呈茲謹將三百五十六卷之大本一部裝潢成帙上呈御覽竊思有

書不可無圖而輿圖以後出者爲勝近年廣東鄒伯奇所刊 皇朝輿地全圖係按照西法測準經緯度以弧綫分度其地面所當天度之部位較爲密合當飭鄂省兩湖書院各學生敬謹摹繪兩分一成直幅八幀以便懸掛一裝冊葉三本以便披尋因天文度數與地球內外上下正相印合於考覽地圖甚有關涉並飭兩湖書院學生另繪赤道南北恆星圖直幅兩幀橫幅一幀藉可考見南北兩極赤黃兩道及躡次之所在又附進上海製造局所刊地球全圖兩幅足以觀環球之疆域上海銅版刊印之亞細亞東部輿地圖一幅足以驗近洲之形勢又因圖係平面欲測天地全形尙費體會推求因並附進製成地球地球各一具俾大圖運轉五洲列國可以一覽而知並一併裝潢派委員弁齎赴 行在敬謹呈進倘蒙萬幾之餘時加垂覽則環球大勢中華全局均可歷歷在目以之上佐 綏定撫馭之方略或亦可稍有裨益得 旨所進畫圖等件均留覽○癸卯諭江南銀元局創設多年行銷甚廣已著成效自應遵照辦理著劉坤一會商張之洞陶模等將江鄂粵三局鑄造章程通籌妥議具奏○奕劻李鴻章奏 等前將總結條款摘要電奏奉 旨公約業已定議即行畫押欽此茲已於七月二十五日會同畫押查 等上年奉 命議和始而各使竟將開議照會駁回幾莫測其用意之所在嗣於十一月初一日始據送到和議總綱十二款不容改易一字 等雖經辦送說帖於各款應商之處詳細開說而各使置若罔聞且時

以派兵西行多方恫喝等相幾因應策亮辱卒以時局艱難鮮能補救撫衷循省負疚良深所有一切辦理情形均隨時電陳摺奏及至商定總結條款各使猶必須候懲處各省教案牽涉人員奉旨始肯書押今雖將京城內撤兵日期填註約內而各國在天津所設暫理地方之都統衙門仍復不肯遽撤各使有俟奉天牛莊交還時一體交還之說容少遲再行設法另案磋商以期早日收回免多窒礙等伏查近數十年內旬有一次措辦必多一次喫虧上年事變之來尤爲倉卒創深痛鉅薄海驚心今和議已成大局少定仍望我朝廷堅持定見外修和好內圖富強或可漸有轉機譬諸多病之人醫自醫調猶恐或傷元氣若再好勇鬪狠必有性命之憂矣懷懼之愚伏祈聖明垂察除將書押約本咨送外務部收存俟回鑾後再行進呈御覽外所有照錄條款全文緣由理合恭摺馳陳報聞○任道鎔奏臣於本年六月二十六日到任以衢州教案攸關緊要日久尙未議結隨先查核原卷等經前撫臣惲祖翼及署撫臣余聯沅先後飭屬拿解案犯行司督府訊錄切供陸續開摺咨由會辦商務大臣盛宣懷咨全權大臣與在京公使議辦在案當時如何會訊浙省無案可稽臣當將官犯鮑祖齡先行派員解赴行在由部定地發配兇生枝節一面電請全權大臣查明示覆七月初十日承准軍機大臣電開奉旨鮑祖齡著定爲斬監候罪名貸其一死減發極邊充軍永不釋回榮銓著革職發往極邊周之德著斬立決



劉樹堂著革職永不敘用飭令回籍交地方官管束鄭永福鄭錫羅道樑均著斥革等因欽此復准兵部咨稱鮑祖齡應發新贖榮銓應發四川轉電前來臣查官犯鮑祖齡計將行抵江蘇常州遵卽換具咨文發驛沿途探投委員令其徑解新贖配所投收一面將已革都司周之德先行正法聞已革藩司榮銓在金陵患病卽電知兩江總督臣劉坤一就近派員起解並飭司將戕官殺教各犯研訊確供分別擬辦並將案文武官紳罪名一併審明定擬詳覆核辦去後茲據署臬司許貞幹會同署藩司誠勳連日督審明確開錄供摺分別擬議會詳前來臣覆查此案該莠民等聚眾殺害英教士湯明心等男女十一人並因西安縣吳德瀛保護教堂謂其通匪因而遷怒乘亂戕殺並及官眷雇丁人等至三十四名之多實屬慘忍已極臣詳加查核悉心酌議其情罪約分三等查羅楠卽羅廷芳周德崇卽景姚程老五卽祥浩周少根蔣榮六徐樟狗卽小麻子汪忠魁卽小告化李長根卽呂長根陳麻子卽老三老范卽范來興鄭榮芝卽鄭榮繼鄭桂生崔元浩卽守灝邵金榮卽蔡家牙兒等十四名均係倡亂禍首或則戕官殺及教士人等或係在場隨同下手逞兇滋事情罪最重均屬法無可貸擬請將該犯等十四名恭請 王命一併先行正法查羅楠先已在監病故應仍照例戮屍與各犯一併梟首首級解赴犯事地方懸竿示眾以昭炯戒其餘葉英程夢熊薛文貴程德魯德彪湯少伯周堂徐鴻福徐鈺堂等九名或臨時攔阻發兵坐視

不救或在道署督帶團勇或充團董當戕官殺教之時均不能保護約束或充兵丁手執各白在場附和或率教堂牛隻或誣更詐欺本官銀錢情殊不法均請擬發極邊足四千里充軍永不釋回惟查徐舉英程夢熊薛文渭三名均屬官犯應請從重改發新疆充當苦差永不釋回至黃百七卽黃德興張德彪嚴高祥孔裕乾戚忠宜卽戚忠義鄒老五等六名或僅倚勢攫取教堂板片或事後向兇犯查問分洋爲數無多訊未隨同在場滋事擬發回西安縣監禁五年以示懲儆又許老三卽許全潮一名應仍監候待質其餘鄒鐸等十七名雖由英領事照會指拿先後獲案但歷訊多堂供無在場滋事實跡內夏狗卽葉夏化一名先係領事指名嚴拿後經主教兩囑保釋自應將鄒鐸卽鄒連生等十六名一併發回該縣暫行管押俟訪查確實再行稟辦仍將現在辦理情形剴切出示曉諭俾衆咸知下部知之○戊申諭李鴻章等奏籌本章辦法一摺據稱向例各項本章均由內閣崇批進呈其請補請署各項之件必俟進呈出科後始行遵旨辦理請嗣後凡遇缺分題本改題爲奏以免積壓其餘本章照舊崇批進呈等語內外各衙門一切題本本屬繁瑣現在整頓庶政諸事刪汰浮文嗣後除題本仍照常進呈外所有補缺輪署本章及向來專係具題之件均著改題爲奏其餘各項本章卽行一律刪除以歸簡易將此通諭知之○己酉戶部奏據全權大臣先後來電並還欸表一紙計此次賠欸議定四萬五千萬兩前數年每年本利

銀一千八百八十二萬九千五百兩嗣後按年遞加每年二千餘萬兩及三千餘萬兩不等至三十九年爲止總共本利銀九萬八千二百二十三萬八千一百五十兩另有允緩半年付利息銀九百萬兩分三年帶交山西歷明年正月初一日即華歷冬月二十二日起照數付足欸目之鉅贖古罕聞限期之迫轉瞬卽屆就中國目前財力而論實屬萬不能堪然和議既成賠欸已定無論如何窘急必需竭力支持臣部職司度支固屬責無可卸各省值此艱鉅尤當勉爲其難亦惟有於出欸力求裁減入欸再求加增庶幾湊集鉅欸屆期歸償於大局不至貽誤謹將擬裁擬增各欸逐一開列恭呈 御覽一虎神營驍騎營護軍營光緒二十五年共開支津貼銀一百四十餘萬兩此項津貼原因添練各營始行加增并非兵丁底餉現擬自本年起卽將各該營加增津貼銀兩照數裁減一神機營經費及步軍營練兵口分抽練兵丁口分光緒二十五年共開支銀一百二十餘萬兩前項經費口分係屬挑練各營兵丁先後加增之欸亦非兵丁底餉現擬將該營加增經費口分銀兩酌量裁減其如何分別辦理之處應俟回京後由該管營王大臣妥議籌辦一滿漢官員八旗兵丁向有米折一項每年由部庫約支銀一百餘萬兩此項米折係按例折減支給計官員俸米折銀每員每季所得不過數兩兵丁甲米折銀每名每季所得不過一兩上下是分之自屬無多而合之便積有成數擬自本年起將前項米折銀兩暫行停支一南洋經費及沿

海沿江防費并各省水陸勇營練營餉有緣營率多事涉虛糜難期實濟擬一律酌加裁汰一房間捐輸  
撥捐捐輸廣東已電奏開辦如果妥定章程辦有端緒尙屬籌款大宗擬通飭各省一體酌量試辦一地  
丁收錢酌提盈餘剔除中飽山東已奏准辦理臣部亦鈔錄原奏行咨各省仿照現擬再行通飭各省切  
實遵辦一鹽斤加價前已奏明辦理有案然爲數尙少款項亦均已撥用擬令各省就現在鹽斤價值每  
斤再加增四文一各省土藥一項茶糖煙酒四項非民生日用所必需重徵之尙無甚妨礙擬令就現抽  
釐數再加三成統計部庫裁減之款可省三百餘萬兩各省裁減及加增之款約略估計亦當有一千數  
百萬兩惟各省情形不同未必皆能遂款遵辦即使遵照部章實力籌辦而款項湊齊尙需時日仍恐有  
誤逾期擬先就賠款二千二百萬兩之數令各該省關將應解部庫西征洋款改爲加放俸餉一款抵京  
餉改爲加放俸餉一款京官津貼改爲加復俸餉一款自光緒二十四年起加增邊防經費一款向未有  
漕省分循案解部漕折一款以上約共銀三百餘萬兩全數提出均留作賠款外尙有一千八百餘萬兩  
卽攤派各省該令按期報解其數目如何分別應按省分大小財力多寡爲斷擬派江蘇省二百五十萬  
兩四川省二百二十萬兩廣東省二百萬兩浙江省一百四十萬兩江西省一百四十萬兩湖北省一百  
二十萬兩安徽省一百萬兩山東省九十萬兩河南省九十萬兩山西省九十萬兩福建省八十萬兩直

隸省八十萬兩湖南省七十萬兩陝西省六十萬兩新疆省四十萬兩甘肅省三十萬兩廣西省三十萬兩雲南省三十萬兩貴州省二十萬兩計共一千八百八十萬兩各省自此次奏文派定以後均應按戶部單開裁減加增各辦法妥速籌辦倘單開各條內有與該省未能相宜及窒礙難行之處各該督撫均有理財之責自可因時制宜量為變通并准就地設法另行籌措惟必須在本省司關道局湊足分派之數如期匯解不得短少遲延致有貽誤倘期限已屆而短少尚多即惟各該督撫是問再通商各海關稅銀擬取足值百抽五現已商辦有成將來開辦後核計關稅究能徵收若干應將增出數目專為賠款應用各省此次分攤之數尙可酌量核減得 旨如所議行○壬子奕劻李鴻章電致 行在軍機處頃據英使薩道義照會按照議和條款第十一款內整頓通商行船各條約及更改進口稅則各事宜現由本國政府派委五印度二等寶星印度政務處副堂馬凱為辦事大臣本館漢務參贊戈頒及督辦英商老公茂公司德貞為協辦大臣該三員約於中歷本月二十九日由歐洲起程計十月初間可到中國會談此項事宜在滬地最便請將該政府擬派與本國辦事大臣會商之員姓名先行示悉等語查英使所稱本係應辦之事至更改稅則從前屢議未定今英國既願商辦東方商務英為最大英允則各國易從是加稅一好機會盛宣懷久在滬地熟悉商情上年奉 旨派充會辦商務大臣於一切商稅情形必更留

心考核該大臣前年曾與現任蘇撫譚鍾麟及總稅務司赫德在京議辦加稅事宜此次擬請 旨派為辦理商稅事務大臣以資熟手總稅務司不能出京查有上海道冊稅務司戴樂爾漢口稅務司以總理均熟悉稅務條理堪以派令隨同辦理與英使會及該使頗以為然乞代奏請 旨 上諭軍機大臣等著派宗人府府丞盛宣懷為辦理商稅事務大臣議辦通商行船各條約及改定進口稅則一切事宜並著就近會商劉坤一張之洞妥為定議稅務司戴樂爾隨同辦理均著隨同辦理○崑岡等奏續查殉難官員請將莊禮本常椿等從優賜卹允之○癸丑先是劉坤一張之洞奏 旨等欽奉光緒二十六年十二月初十日 上諭法令不更鋼習不破欲求振作當讀史 臣等軍機大臣大學士六部九卿出使各國大臣各省督撫各就現在情形參酌中西政要舉凡朝章國故吏治民生學校科舉軍政財政當因革當省當併或求諸己或取諸人如何而國勢始興如何而人才始出如何而度支始裕如何而武備始修各舉所知各抒所見通限兩箇月詳悉條議以聞等因欽此仰見我 皇上懲越多難必欲掃積習以濟時艱感泣之餘且奮 臣等嘗聞之周易乾道變化者行健自強之大用也又聞之孟子過然後改固然後作動心忍性增益所不能者生於憂患之樞機也上年京畿之變大局幾危其為我中國之憂患者可謂鉅矣其動忍我 君臣士民之心者可謂深矣窮而不變何以為國然則修中華之內政採列國之專

長 聖道執中洵爲至當惟是中國貧弱廢弛之弊或相沿百餘年或相沿二千餘年一旦欲大加興革  
必須規畫周詳確有下手之處然後血氣生而宿疴自去疣癰決而元氣可支竊謂中國不貧於財而貧  
於人才不弱於兵而弱於志氣人才之貧由於見聞不廣學業不實志氣之弱由於苟安者無履危救亡  
之遠謀自足者無發憤好學之果力保邦致治非人無由識先就育才興學之大端參考古今會通文武  
籌擬四條一曰設文武學堂二曰酌改文科三曰停罷武科四曰獎勵游學敬爲 聖主陳之一設文武  
學堂取士之法自漢至隋爲一類自唐至明爲一類無論或用選舉或憑考試立法雖有短長而大意實  
不相遠漢魏至隋選舉爲主而亦間用考試如董晁郊杜之對策是也唐宋至明考試爲主而亦參用選  
舉如溫造柳放之徵召是也要之皆就已有之人才而甄拔之未嘗就未成之人才而教成之故家塾則  
有課程官學但憑考校此皆與三代學校之制不合現行科舉章程本是沿襲前明舊制承平之世其人  
才尙足以佐治安民今日國威愚深才乏文敝若非改絃易轍何以拯此艱危然而中國見聞素狹講求  
無素卽有考求時務者不過粗知大略於西國政治未能詳舉其章西國學術未能身習其事現雖舉行  
經濟特科不過招贅山隍始之意只可爲開闢風氣之資而未必遽有因應不窮之具考局官司徒之職  
小戴禮學記之文大率皆以德行道藝兼教并學學成而後用之此外見於經傳者鄉國之學皆兼六藝

大夫之職必備九能書禮干戈司成並教寄象隄譯王制分官海外圖經伯益所傳潤色專對論語所重又按三代之制庠序之稱曰士卒伍之稱亦曰士實爲文武合一文武並重之明徵若孔子兼通文武學於四裔尤聖人躬行垂教之彰彰者此後漢舉使才唐採回歷隋志經籍多收方書明初文科亦兼騎射欽惟我 朝康熙年間測天造職皆用西人 內府地圖創用西法之經緯綫此圖所刻銅板卽用東洋銅板之陰陽文尼布楚界碑兼用三體文字乾隆年間西域同文志兼列清漢蒙古西番托忒回部之書至於 內廷功課八旗授官皆係文武兼習 祖宗舊制洵足爲萬代法程今泰西各國學校之法猶有三代遺意禮失求野或尙非誣其立學教士之要義有三一曰道藝兼通二曰文武兼通三曰內外兼通其教法之善有四一曰求講解不責記誦一曰有定程亦有餘暇一曰循序不躐等一曰教科之善官定頒發通國一律大小各學功有淺深意無歧異其考校進退章程皆用北宋國學積分升舍之法才能優細切實有據既不虞試官偏私亦不致摸索偶誤故其人才日多國勢日盛德之勢最强而學校之制惟德最詳日本興最驟而學校之數在東方之國爲最多興學之功此其明證其學校教法大率少年者先入小學堂先教以淺近文理算法史事格致之屬小學堂又分初等高等兩種小學成後選入中學堂所學門類甚多名曰普通學如國教格致算學地理史事繪圖體操兵隊操本國行文法外國語言文字行



文法等事皆須全習惟外國文字只兼習一國無論大小學堂皆有講國教一門皆有學兵隊之操場日本之教科名曰倫理科所講皆人倫道德之事其大義皆本五經四書普通學畢業後發給憑照升入高等學堂習專門之學自此以後然後文武分途或文或武聽其便惟文武皆必先習普通至專門之學習文事者名高等學校英分經教法醫化工六科又另設專門農商礦學法與英略同德又另設專門工學日本高等學校亦分六門一法科二文科三工科四理科五農科六醫科每科所習學業各有子目其餘專門各有高等學校查日本門目與中國情形較近歐美無學不兼請西教日本無學不兼講倫理習武備者名士官學校略分地理戰史戰法軍械測繪工程經理軍醫八門兼習外國文字兵式體操兵隊操行軍操射的擊刺乘騎泅水等事射的即鎗機打靶擊刺即短刀刺鎗互擊習文事者高等學校畢業後發給憑照略如中國舉人分類量能而授以官其願再學者升入大學校大學校畢業領照者略如中國進士習武備者普通畢業後先入營練習半年方入士官學校士官學校畢業後仍須入營練習三年方為畢業第一年學為兵第二年學為弁第三年即在其營內充弁其弁亦名下士官其分際略如中國把總外委額外此堂畢業後發給憑照其國家即用為各軍少尉自少尉以上皆名士官大尉中尉少尉略如都司守備千總百官少尉以後可在本營敘勞升轉若僅由充兵出身者官至特務曹長為止曹長略

如把總係由士官學校出身者官至大佐爲止大佐略如副將中佐少佐如參游若欲爲大將中將少將者仍須升少佐中佐後再入陸軍大學校三年習水師者名海軍大學校其海陸大學校體制與文藝大學校同大將如統兵大臣中將少將如提鎮以上所舉皆日本官名取其易曉各國學制教法節目雖有小異用意事事相同其大中小學之年限無論文武大率三四年不等等級漸深者科目亦漸加多其東西各國今昔章程微有不同者大約西器而東簡西遲而東速昔專壹而今變通如西國馬上不放火鎗日本近三年始於馬上操鎗之類其學校監督皆用武官爲之以武官於禮節規矩最爲謹嚴詳密文職偶有脫略武官斷不通融此外國學校教士官人之大略也中等參酌中外情形酌擬今日設學堂辦法擬令州縣設小學校及高等小學校童子八歲以上入蒙學習識字正語音讀蒙學歌訣諸書除四書必讀外五經可擇讀一二部家塾義塾悉聽其便由紳董自辦官勸導而稽其數每年報聞上司可也十二歲以上入小學校習普通學兼習五經先講解後記誦但解經書淺顯義理兼看中外簡略地圖學粗淺算法至開立方止學粗淺繪圖法至畫出地面平形止習中國歷代史事大略 本朝制度大略習柔軟體操三年而畢業紳董司之官考察之十五歲以上入高等小學校解經書較深之義理學行文法學爲策論詞章看中外詳細地圖學較深算法至代數幾何止學較深繪圖法至畫出地上平剖面立剖

面水底平剖面止習中國歷史大事外國政治學術大略習器具體操兼習外國一國語言文字之較淺者此學必設兵隊操場三年而畢業官司之紳董佐之畢業後本管知府考之分數及格者給予憑照作為附生送入府學校分數欠者留學府設中學校十八歲高等小學校畢業取為附生者入中學校習普通學其有監生世職職銜願入普通學者亦聽但須酌捐學費與附生一律教課其有營弁營兵文理通暢能解算法繪圖考驗有據者亦准收入此學溫習經史地理仍兼習策論詞章並習公牘書記文字學精深算法至弧三角航海駛船法止學精深繪圖法至測算經緯度行軍圖目揣遠近斜度止習中國歷史兵事習外國歷史律法格致等學外國政治條約即附於律法之內并講明農工商等學之大略習兵式體操兼習外國一國語言文字之較深者詞章一門亦設教習學生願習與否均聽其便并兵入學者專學策論免習詞章此學亦必設兵隊操場三年而畢業學政考之給予憑照作為廩生送入省城高等學校省城應設高等學校一區大省容二三百人中小省容百餘人屋舍不便者分設兩三處亦可但教法必須一律非由中學校普通學畢業者不能收入擬參酌東西學制分為七專門一經學中國經學文學皆屬為二史學中外史學中外地理學皆屬為三格致學中外天文學外國物理學化學電學力學光學皆屬為四政治學中外政治學外國法律學財政學交涉學皆屬為五兵學外國戰法學軍械學經理

學軍醫學皆屬焉大農學七工學凡測算學繪圖學道路河渠營壘製造軍械火藥等事皆屬焉共七門各認習一門惟人人皆須兼習一國語言文字此學亦必設兵隊操場至醫學一門以衛生爲義本爲養民強國之一大端然西醫不習風土中醫又鮮真傳止可從緩惟軍醫必不可緩故附於兵學之內並另設農工商礦四專門學校各一區專以考驗實事爲主機器藥料試驗場皆備亦三年而畢業其普通學成願入此四學者聽入此四學者中國經學文學皆令溫習無論何學皆有兵隊操場其習武者專設一武備學校擇普通畢業之願生願習武者送入四書中國歷史策論人人兼習其餘悉依外國教課之法并專習一國語言文字或仿日本并設一礮工學校專學製造鎗礮之法均三年而畢業文學生高等學校畢業後除農工商礦專門四學另爲章程外此七門學生學律法者派入交涉局學習實事名曰練習學生學兵法者派入各營學習實事亦名曰練習學生其餘五門學生均隨其所願派入農工商礦等局兼習實事名曰兼習學生均以實在局在營一年爲度農工商礦四專門學生三年畢業後應學派赴本省外縣山鄉水鄉考驗農業工學派赴本省外省釐洋工廠考驗製造商學派赴南北繁盛口岸考驗商務礦學派赴本省外省開礦之山煉礦之廠考驗操煉均名曰練習學生亦均以實在出外游歷練習一年爲度其武學生武備學校畢業後令入營學習操練一年半充兵半年充弁以實在營一年爲度合

計在學肄業及出外練習文武各門均四年學成先由督撫學政考之再由主考考之取中者除送入京師大學校外或卽授以官職令其效用大學校學業又益加精門目與省城所設高等專門學校同三年學成會試總裁考之取中者授以官此大中小學教法門目等級年限之大略也其考用之法高等小學學成者本皆知府考之普通中學學成者學政考之均不糊封縣送府考府送學院考均須詳注分數知府學政考取榜示亦須注明分數不准渾淪取進高等專門學成者督撫學政分文武兩途考之應分幾場臨時酌定取者作爲優貢武者作爲武優貢其文事由他途徑入普通中學游送農工商礦四專門學非由生員者及由普通中學畢業徑入四門專學非由高等學畢業者其武事由弁兵徑送入普通學非由生員者一併准其與考其優貢所取人數視本省中額加倍 欽派考官會同督撫學政亦分文武兩途考之應分幾場臨時酌定考其專門之學及各國語言文字非優貢不得與考大率督撫學政所取優貢卽係錄送鄉試之意應試人少且諸學有須面試者勿庸糊名易書考中者作爲舉人其非由生員出身及非由高等出身者作爲副榜擇其中式前半若干名分別送入京城文武大學校所以止送一半入大學校者一爲京師大學若欲全容天下舉人費用過多故減半送京以節經費一爲分半就職俾得及時效用以應目前急需其有未補送入大學校者及已經送京而不願入大學校願就職者聽其未送大

學校而不願就職自願留學以待下科者亦聽就職者文授以七品小京官及六七品佐貳首領分部分省候補或充各局委員武授以守備千總等官發營差委考官照學政例准帶幕友二三人同考官由外省酌量訪求聘委不拘官階亦不必本省人員京城設文事大學校水軍陸軍大學校各一學藝又益加精門目略與省城專門學校同學成者欽派總裁大臣考之作爲進士廷試後文授以部屬知縣等官武授以都司守備等官均令分部分省分標候補優其序補班次勿庸歸選如朝廷需用編纂修史應奉文字之詞臣宿衛禁廷之侍衛應隨時聽候諭旨考選不在科舉常例之內統計自八歲入小學起至大學校畢業止共十七年計十八歲爲附生二十一歲爲廩生二十五歲爲優貢舉人二十八歲爲進士除去出學入學程途考選日期外亦不過三十歲內外較之向來得科第者并不爲遲此大中小學層遞考取錄用之大略也其取中之額卽分科日歲科考取進學額以爲學堂所取生員之額分鄉會試中額以爲學堂所中舉人進士之額優貢應請新定學堂之額大率比本省中額加倍而略多初開辦數年學堂未廣取中尙少前兩科每科分減額日中額學額三成第三科每科分減額四成十年三科之後舊額減盡生員舉人進士皆出於學堂矣至日久才多以後應仿各國章程視其學業分數以爲中額之多少并可不拘定額以昭核實而資策勵總須較舊額之數有增無減此學堂取中額數移舊額

日後并不限以定額之大略也或謂廢八股則人不讀經書不尊聖賢不宗理學不知八股始自前明自漢至宋皆無八股何以傳經術道代有名儒忠孝節義史不絕書卽如周程張朱乃理學之宗主其時未嘗有八股也或謂廢八股則人不能爲文不知文章之美者莫如春秋之左國戰國之諸子兩漢之馬班唐宋之八家其時未嘗有八股也或謂廢八股則當日專攻帖括者無進身之路不知歷來擅長八股諸名家亦必係學賸才敏文筆優長之士其最著者前明如唐順之歸有光 國朝如韓荃方苞輩卽不由場屋豈患無自見之學登進之階故能爲好時文者考試策論固屬優爲兼習諸學亦非難事無論少年易於改業卽二十五歲以上至五十歲者除外國語言精微算法外何事不能通曉若從此三科十年以後不能中式而又不能改習諸學則斷非有才有志之人 國家取之無益於用然此輩仍可爲小學中學經書詞章之師其衰老不第而學行尙有可取者可由督撫學政訪察考選 朝廷優予體恤六十歲以上者酌給職銜五十歲以下者廣設其途分別舉貢生員用爲知縣佐貳雜職詳見酌改文科專條似亦足以安宿儒而慰寒賸矣捐納既停卽中等儒生豈患無出路哉此裁減舊日學額中額仍將從前舉貢生員分別錄用之大略也論外國設學之定法自宜先由小學校辦起層累而上以至中學高等大學方爲切實有序惟經費太絀師範難求只可剴切勸諭竭力陸續籌辦若必待天下徧設數萬小學數

百中學然後升之高等學大學而教之用之至速亦須十年時事日棘人不我待刻舟膠柱必致空言誤事今日爲救時計惟有權宜變通先自多設中學及高等學始選年力少壯通敏有志之生員迅速教之先學普通緩習專門應各就省城及大府酌量情形迅速籌辦以資目前之用取才由粗入精立法由疏入密凡事何莫不然將來小學林立中學亦多則循序漸進取才既裕而教法亦不勞矣蓋三十歲而入官科名不得爲晚自初學以至學成十七年而成文武兼備之人才造就不得爲遲惟事急需才恐難久待查日本文武各種學校皆有速成教法於各項功課擇要加功於稍緩者量加省減刻期畢業應請旨飭出使大臣李盛鐸切託日本文部參謀部陸軍省代我籌計酌擬大中小學各種速成教法以應急需此權宜救急先設普通中學暨採訪速成教法之大略也惟成事必先正名三代皆名學校宋人始有書院之名宋大儒胡瑗在湖州設學分經義治事兩齋人稱爲湖學並未嘗名爲書院今日書院積習過深假借姓名希圖膏獎不守規矩動滋事端必須正其名曰學乃可鼓動人心滌除習氣如謂學堂之名不古似可卽名曰各種學校既合古制且亦名實相符總之中華所以立教我朝所以立國者不過二帝三王之心法周公孔子之學術今宗有則不悖經書學業則兼通文武特以世變日多故多設門類以教士取其周知四國博學無方正與經傳所載三代教士取人之法相合看似無事非新實則無法非舊



且經史詞章仍設專門學人文人皆有自見之路何得以唐人專攷詞章之下策前明八股之俳體視為  
儒者正宗哉臣等所擬以上辦法不過明宗有標門類分等級計年限籌出路除妨礙舉其大略如此至  
於詳細章程究應如何斟酌損益之處應候 敕諭裁定此一事為救時首務振作大端伏望我 皇上  
思危慮患飭取日本學校章程迅速詳議 乾斷施行收人心以固國基四海瞻仰首在此舉矣一酌改  
文科科舉一事為自強求才之首務時局艱危至此斷不能不酌量變通半年來諮訪官紳人士衆論愈  
同兩廣督臣陶模山東撫臣袁世凱咨來奏稿言之甚為懇切改章大有總以講求有用之學永遠不廢  
經書為宗旨擬即照光緒二十四年臣之洞所奏變通科舉奉 旨允准之案酌辦原奏乃係參酌古今  
求實崇正力駁侈談新學者之謬論不過原本舊章力求核實而已大略係三場先後互易分場發榜各  
自去取以期場場核實頭場取博學二場取通才三場歸純正以期由粗入精頭場試中國政治史事二  
場試各國政治地理武備農工算法之類三場試四書五經經義經義即論說考辯之類也頭場十倍中  
額二場三倍中額原奏經禮部通行陝西有案可查惟聲光化電等學場內不能試驗擬請刪去此係原  
本朱子救弊須兼他科目取人之意歐陽修隨場去留鄙惡乖誕以次先去之法而又略仿現行府縣擬  
試童生學政會考優貢之章且可免寒士之候榜艱難考官之疲勞故率似乎有益無弊簡要易行竊惟

今日育才要指曰宜多設學堂分門請求實學者取有據體用兼賅方為有裨世用惟數年之內各省學堂不能多設而人才不能一日不用即使學堂大興而日生員年歲已長資性較鈍不能入學堂者亦必須為之籌一出路是故漸改科舉之章程以待學堂之成就似此辦法策論乃諸生所能史學政治時務乃三場策題所有考生斷不致因改章而閑筆科場更可因改章而省費而去取漸精學業漸實所得人才固已較勝於前矣茲擬將科舉略改舊章令與學堂並行不悖以期兩無偏廢俟學堂人才漸多即按科遞減科舉取士之額為學堂取士之額其穎敏有志者必以漸次改業歸入學堂其學優而年長者文平而品端者儘可寬格收羅量材錄用或取作副榜多取數名或令充歲貢倍增其額或推廣大挑每科一次或挑作廕錄令其讀敘有資或舉人比照孝廉方正生員比照已滿吏准其考職令其入官効用宜彙總核計以上各途推廣錄用之數足以抵每科減額之數則舊日專習時文者亦尚有進身之階十數年以後舊廸改業者日多株守沈淪者日少且仍可為小學堂中學堂經書詞章之師其衰老者可從優賞給職銜總之但宜多設其途以恤中才之寒賤而必當使舉人進士作為學堂出身以勵濟世之人才只可稍寬停罷場屋試士之期而不可使空疏無具者永占科目之名果使捐納一停則舉貢生員決不患其終無出路此則兼顧疏濬漸移默化而不患其窒礙難行者也一停罷武科文武兩科並補而兩

科之輕重利弊迥然不同國家任官求才無論章程如何總之必用讀書明理之士因近年帖括之士有文無實故改革以求實學先略改科舉章程以取已有之人才次廣設學堂以教未成之人才他日專門學成體用兼備仍是此等讀書明理之人其法小變其意仍同若武科則不然硬弓刀石之拙固無益於戰征弧矢之利亦遠遜於火器至於默寫武經大率皆係代脩文字且不知無論韜略以故軍興以來以武科立功者概乎其未有聞凡武生武舉武進士之流不過恃符篆滿健訟佐闕抗官擾民既於國家無益實於治理有害此海內人人能言之無待臣等之煩言者也或謂武生等可使改習鎗礮不知利器散布民間流弊太大實無防察之法萬不可行或謂武生等可使入武備學堂肄業不知學堂定法無論水師陸師皆必須會讀書通文理若不識文字者雖有西師營教精者不能解粗者不能記斷無受教之地或謂武科所以收強梁不馴之人才不知凡應武試者大率小康之家子弟椎魯遊蕩不肯讀書乃使之習武以博科目之榮其弓馬衣裝之費較之文生爲多故世俗有窮文富武之謬夫取士求將本欲得良善守法之士教以禮義授以技能以備干城腹心之用豈有搜羅不逞加虎以冠且天下盜賊會匪亦多矣豈武科所能網羅者哉今日勇營甚多其材武有力之輩皆可容納何藉武科或謂古今名將未必盡能知書不知古之孫吳韓岳戚繼光今之羅澤南王鑫彭玉麟等何一非學古能文之士間有不學問而

爲名將者多由閱歷而來故兵勇起家爲良將者有之然在今日已不能與強敵角勝若應武科者平日所習皆與兵事無涉既不曉鎗礮之精復不諳營陣之法及取中武科年齒已長習氣已深循資數年即可爲參遊都守何所謂閱歷哉查國家官制武職以營伍爲正途八旗世家無非兵籍此時講求兵事必須武學西操相資爲用其學堂畢業入營操練精熟者自必予以出身洊擢官職將來內而禁衛外而將校皆可於此取之考拔擢用之法另詳專條若仍以循舊之武科濫廁右職殊於講武勵才之出路有妨近年自故督臣沈葆楨以後中外大臣言武科改革者甚多蓋久已共知其弊臣等揆之今日時勢武科無益有損擬請宸斷奮然徑將武科小考鄉會試等場一切停罷其舊日之武進士武舉兵部差官一律發標學習考察人材酌量委用補苴不必按資挨次選補實缺武生年壯有志者令其講求武學以備應募入伍之用疲老耆聽其改業如此則學堂講武學者營弁精操練者在標有戰功勞績者登進之途較寬必皆鼓舞奮興而將校皆有實用此誠自強講武之一大關鍵也一獎勵遊學學堂固宜速設矣然而非多設不足以濟用欲多設則有二難經費鉅一也教習少二也求師之難尤甚於籌費天下州縣皆立學堂數必逾萬無論大學小學斷無許多之師是則惟有赴外國遊學一法查外國學堂法整肅而不苦教知要而有序爲教師者類皆實有專長其教人亦有專書定法凡立一學必先限定教至何等地方

位算定幾年畢業總計此項學業共須幾年若干時刻方能教畢按日排定每日必作幾刻工夫定爲  
程一刻不曠如期而畢故成效最確學生亦願受教而教法尤以日本爲最善文字較近課程較速其  
望學生成就之心至爲懇切傳習易經費省回華速較之學於歐洲各國者其經費可省三分之二其  
成及往返日期可速一倍江鄂等省學生在日本學堂者多故臣等知之甚確此時宜令各省分遣學  
出洋遊學文武兩途及農工商等專門之學切須分門認習但須擇其志定文通者乃可派往學成後  
有憑照回華加以覆試如學業與憑照相符卽按其等第作爲進士舉貢以輔各省學堂之不足最爲  
策此時日本人才已多然現在歐洲學堂附學者尙數百人此舉之有益可知如宜專派若干人入其  
範學堂專學師範以備回華充各小學中學普通教習尤爲要著再官籌學費究屬有限擬請 明諭  
省士人如有自備資斧出洋遊學得有優等憑照者回華後覆試相符亦按其等第作爲進士舉貢如  
則遊學者衆而經費不必盡由官籌蓋遊學外國者但籌給經費而可省無數之心力得無數之人才  
可謂善策矣若自備資斧遊學者准按照優獎錄用則經費并不必多籌尤習之習者矣此四條爲  
材國治之首務其間事理皆互相貫通互相補益故先以此四事上陳蓋非育才不能圖存非興學不  
育才非變通文武兩科不能興學非遊學不能助興學之所不足揆之今日時勢倖無可倖緩無可緩

位算定幾年畢業總計此項學業共須幾年若干時刻方能教畢按日排定每日必作幾刻工夫定爲課程一刻不曠如期而畢故成效最確學生亦願受教而教法尤以日本爲最善文字較近課程較速其盼望學生成就之心至爲懇切傳習易經費省回華速較之學於歐洲各國者其經費可省三分之二其學成及往返日期可速一倍江鄂等省學生在日本學堂者多故臣等知之甚確此時宜令各省分遣學生出洋遊學文武兩途及農工商等專門之學切須分門認習但須擇其志定文通者乃可派往學成後得有憑照回華加以覆試如學業與憑照相符即按其等第作爲進士舉貢以輔各省學堂之不足最爲善策此時日本人才已多然現在歐洲學堂附學者尙數百人此舉之有益可知如宜專派若干人入其師範學堂專學師範以備回華充各小學中學普通教習尤爲要著再官辦學費究屬有限擬請 明諭各省士人如有自備資斧出洋遊學得有優等憑照者回華後覆試相符亦按其等第作爲進士舉貢如此則遊學者衆而經費不必盡由官籌蓋遊學外國者但籌給經費而可省無數之心力得無數之人才已可謂善策矣若自備資斧遊學者准按憑照優獎錄用則經費并不必多籌尤善之善者矣此四條爲求材圖治之首務其間事理皆互相貫通互相補益故先以此四事上陳蓋非育才不能圖存非興學不能育才非變通文武兩科不能興學非遊學不能助興學之所不足揆之今日時勢倖無可倖緩無可緩仰

繼 宸衷獨斷決意施行其間條目章程自須詳議而大綱要有無可游移其有爲因循遷就之說者惟賴 朝廷堅持勿爲其所搖奪其餘各條另摺奏上 聖等往復商酌意見一切相同未便各自具摺轉嫌雷同重複謹合詞恭摺陳又奏 聖等籌擬興學育才四條業經會同奏陳在案竊維治國如治疾然陰陽之能爲患者內有所不足也七情不節然後六氣感之此因內政不修而致外患之說也療創傷者必先調其服食安其臟腑行其氣血去其腐敗然後施以藥物鍼石而有功此欲行新法必先除舊弊之說也蓋立國之道大要有三一日治二曰富三曰強國既治則貧弱者可以力求富強國不治則富強者亦必轉爲貧弱整頓中法者所以爲治之具也採用西法者所以爲富強之謀也雖將中法之必應整頓變通者酌擬十二條一日崇節儉二曰破常格三曰停捐納四曰課官重祿五曰去書吏六曰去差役七曰恤刑獄八曰改選法九曰籌八旗生計十曰裁屯衛十一曰裁綠營十二曰簡文法敬備 朝廷採擇臚陳於左一崇節儉昔春秋傳記衛文公之興國也農工商學諸善政無一不舉而首先書之曰大布之衣大帛之冠是知國家當多難之際剜痛之餘欲求振興未有不以節儉爲先務者後世若漢晉隋唐宋之令主皆以儉約著稱遂興其國伏讀我 聖祖仁皇帝庭訓格言服繭紬之衣無兼味之饌省宮女之數內殿一甌用至四十年宮闈一年之費只抵前明一月儉德昭垂遂以戡亂致治今京畿彫殘黎民饑饉

貽歎浩大民生困窮以後更不知如何景象此時若欲挽回天意激勵人心非貶損實長力行節儉不可竊見自兩宮西幸以來備嘗艱難力戒糜費今年又奉明旨裁省例貢並戒蹕路虛糜仰見聖心乾惕震恐此誠自強之基誠慮回京以後所司以相沿成例一切供奉仍照成規不能仰喻宸衷贊成盛德擬請明降諭旨力行節儉始自宮廷所有不急之務一切停罷無益之費一切裁減即不能不興之工務從儉省核實內務府諸臣再有營私糜費者必重懲之並請諭飭內外大小臣工務從節儉力禁奢華所有宮室與服力求樸素應酬會勿得浮靡上官歲時之供億一概禁絕督撫巡閱學政按試以及一切馳驛過境之費官要差所有舟車館舍廚傳供張嚴禁華侈不准需索騷擾寬於商民嚴於職官有違旨者上司立予糾參此不惟愛惜物力之心乃所以昭不忘憂患之意且不尚玩好則工無淫巧而併力於製造不崇侈靡則商輕成本而增多其贏餘官以儉而廉民以儉而足農多本富則有用之貨物易銷工執正業則出口之利源日擴是不惟務本之常經抑亦取外之要策也恭讀聖諭屢以臥薪嘗膽為言夫欲使天下四海見朝廷實有臥薪嘗膽之志者必自三事始一曰儉二曰勤三曰破格三事之中惟儉最為顯著而易行化臣民而阜財用其效亦最速必朝廷時時有不忘在宮之心則國勢有轉否為泰之望矣一破常格從來國家開創之初疎節闊目上下情通既能周悉民隱亦能鼓舞



賢才故成功易中葉以後拘文牽義上下否隔民情多壅於上聞人才亦難於自見故致治難今外患日迫政權漸侵迥非光緒初年之舊時局已非常局則政事豈可仍拘常格伏讀 聖諭有云積習相仍因循粉飾以致成此大衅洵爲深中時弊之至論積習莫甚於驕惰惡勞因循莫甚於藉口積重粉飾莫甚於實情不 上聞若因仍舊習文貌相承則下欺而上不悟民怨而官不知敏捷者以粉飾爲能庸懦者以無事爲福以當難強必不支矣昔漢高帝以褐衣挽轡拔襄散光武以披襟岸幘見馬援唐太宗問孔穎達上下情隔之諫賜物二百段又以尙書郎不解乘馬爲戒金太祖開國之初地坐而謀上馬而戰以故其兵滿萬無敵遂成大業今日謀國之急交鄰之難不惟五十年前所無且亦非歷代所有嘗讀周易屯初九之象曰以貴下賤大得民也蓋國家當屯險多難之時帝王羣臣皆必力求得民之道乃能動乎險阻而得亨貞之吉竊謂此時 朝廷一切舉動宜視爲草昧締造之時視爲與民同患之時將一切承平安樂之繁文縟節盡爲簡省變通中外大小臣工尤以除官氣逸下情爲主應行破除常格之事甚多茲先約舉最要者三事一曰敷奏奏對之際 天威咫尺往往戰栗矜持不能盡言至於上疏陳言每以不能稱 旨爲慮薄之使言猶多顧忌若以折檻批鱗爲戒則雖至於顛覆而無人爲 朝廷言之矣擬請明諭中外凡臣工奏疏 召對務以直言正諫指陳利害爲主不必稍存忌諱言事過於懇直者體

式稍有未合者亦望 朝廷曲予優容以收從善納規之益一曰儀文今日文武官員官氣最重實爲失人心害政事之根故大學士曾國藩故巡撫胡林翼常切切言之文官賤視其民罕與民接炫之以儀從威之以鞭扑故罕通民隱武將賤視其兵罕與兵親驅爲賤役視爲利藪故罕誠兵情夫不得民心而能治不得兵心而能勝未之有也應請切戒文武各官務須屏除官氣不尚虛文必其誠意感孚然後兵民皆可用矣至於 上天下澤 堂高廉遠其分不可不肅而其情不可不通若尊崇嚴畏之意過多則誠懇忠愛之意漸少必 朝廷有體恤羣臣之心有 聖不自聖之意斯臣下得進忠言庶民皆同休戚矣至於 朝章國政其間有無應行變通酌定之處非 臣等所敢擅擬應請 飭下廷臣詳擬奏請 聖裁一曰用人承平用人多計資格所以抑躁進時危用人必取英俊所以濟艱難今之仕途不必其皆下劣也同一才具而依流平進者多驕驕精力漸衰者憚改作資序已深者耻下問平日論吏才者患更事之不多今當變更政治之際則惟患更事之太多蓋其所謂更事者不過病習空文於中外時局素未講求安有閱歷而廷談謬論成見塞胸不惟西法之長不能採取學步卽中法之弊亦必不肯銳意掃除古人有言老耆謀之壯者行之施之今日似爲有當或謂進用太驟易開鑽營徼幸之風莫如略仿宋人外吏轉官須有十人薦舉之例如其人有四五人保薦者卽破格用之如此則徇私援引之弊除矣如祇一人

保薦則必試之以事果有實效然後破格用之如此則虛聲誤探之弊免矣若取之但責之以文貌用人仍困之以例章則所得者皆尋常之俗吏而已豈能濟非常之艱難乎一停捐納捐納有害吏治有妨正途人人能言之戶部徒以每年可收捐三百萬遂致不肯停罷查常捐若銜封翎枝貢監等項本不可停若將常捐量爲推廣但係虛與榮名無關實政者皆可擴充假如清班之銜章服之貴因公處分准其捐免遊幕省分捐准服官寄籍捐准應試生員捐免歲考節孝旌表捐准年限從寬以及 賜歸建坊之類似皆可酌加推廣擬請 勅下戶部博採衆議量爲推廣必可抵補捐數大半卽或不敷百餘萬然今日須籌賠款數千萬斷不宜惜此區區以致牽絀有妨自強要政擬請 宸衷獨斷明降 諭旨俟此次奏旨賑捐完竣後卽行永遠停罷以作士氣而治治源一課官重祿方今事變日多京外各衙門斷非僅通時文緝查成例者所能勝任欲濟世用非學無由擬請京城設仕學院外省均設校吏館仕學院校吏館中多儲中外各種政治之書凡中外輿圖公法條約學制武備天算地理農工商礦各學之書咸萃其中選派端正博通之員爲教習令候補各員均入其中分門講習嚴定課程切實考核進功者給予憑照量材任用昏惰者懲儆留學不可教者勒令回籍其實缺各官願入館討論求益者亦聽其便惟善教以培其材尤須重祿以養其廉查京職俸銀俸米爲數無多加以銀賤物貴實不足以自給而科道爲風憲之

官翰爲儲才之地俸廉尤宜從優光緒八年戶部奏定令各省關籌解京官津貼銀二十六萬兩乃行  
之一年旋將此項撥充餉需且原定數目較少大小各官不能徧及其分給者爲數亦不敷用度今日亟  
宜另籌辦理至三品以上大員用度較繁關係甚重必應一併籌及其名目卽稱爲養廉勿庸再稱津貼  
方爲名正言順擬仰懇 天恩卽以原議京官津貼銀二十六萬兩仍行發給各官至此項餉需應令  
各省照數另籌奏明抵補此外擬請卽以此次奏陳裁汰屯衛各官所省之款并衛田新擬酌捐之款發  
給抑或另籌他款應請 旨飭議施行大約必須籌款百萬乃足敷各衙門辦公之需杜乞貸苞苴之術  
至外省若府縣等官甘苦亦不一致州縣有民社之寄知府有表率之責斷不可令其苦累州縣瘠區則  
科派獄獄而病民衝繁則虧挪庫款而病國不得已而爲調劑調署之策則傳舍無常而國與民交病其  
號稱優缺者不過隱匿契稅雜稅減削驛站經費甚至捏報例災蓋州縣官卑事繁科場考棚之攤捐招  
解緝捕之繁費驛路大差之供億委員例差之應酬其養廉萬不足以給用不得不迫而出此故州縣多  
一分之繁費則國帑暗傷一分之進款知府公費無非取給州縣然公費多少不一往往藉端挑剔格外  
誅求故府州縣皆須令其辦公有資然後能盡心於國事民事應請 敕下各省體察本省情形省州縣  
之繁費禁上司之需索其辦公不敷者擬爲撥給職田一法考晉唐宋明以來郡縣等官皆有職田明又

有邊城廢廉田此制仍可仿行查各州縣大率皆有充公之田私墾官荒並未升科之地及原主久亡契據久失地棍冒認爭訟不休之業此類各項田地若認真清查一州縣至少亦有數十頃應將此業卽撥充州縣職田之用收其租課以資辦公州縣既無累可言則可令其久任責以實政設遇地方有重要難辦之事只可因擇人而量移不准因恤累而更調一切公款責令切實報解不得藉口侵欺知府辦公竭蹶者亦爲籌增公費至增加養廉公費以後京外各官如再有貪墨敗檢者除參革外仍行追罰充公方今度支困絀之際豈願更增用款然果使賢才無北門貧窶之憂當官有公爾忘私之志則爲國家所省者多矣一去苛吏蠹吏害政相沿已二千年今仰蒙 乾斷一旦剷除天下臣民無不欽頌臣等歷年所見部文不過查敘舊案核算數目從未論及事理下等司官皆優爲之其准者不過曰與某案尙屬相符尙屬實在情形其駁者不過曰與舊案不合窒礙難行間有援據古今發爲議論指陳事理語有斷制者則必係司官秉筆或經堂官改定一望而知決非經承稿書所能爲然則此輩一無所爲但工作弊索賄至外省各衙門書吏弊習亦多若督撫衙門之兵房藩司之吏戶房州縣之糧戶房稅契房皆所不免而州縣爲九莖緣兵燹以後魚鱗冊多已無存僅徵底冊皆在書吏之手緩欠飛漏弊混極多把持州縣盤剝鄉民稅契一項包攬隱匿官無如何其實無論大小衙門書吏技倆皆極庸劣凡緊要奏牘咨札詳

稟或本官親自屬稿或委員幕友擬稿從無書吏能助筆者所能爲者不過例行公事依樣畫廬而已若各局文件多非循例之事則皆係委員辦稿至清書則滿紙俗別謬誤脫落尤爲惡劣實於公事有妨正擬推闕 諭旨之意將外省書吏積弊大加整飭昨讀電傳邸鈔已奉 明諭將各省書吏概行裁汰自應欽遵辦理茲擬將各省書吏一律汰除改用委員其額設辦稿經承督撫司道知府直隸州衙門用本省候補佐貳雜職爲之稱爲稿委繕寫清書用本省生員爲之稱爲寫生惟各衙門清書人數甚多如生員可選充寫生者一時不能足數則於生員之外就該衙門清書中挑選謹慎守法者充作書手稱爲貼寫生同通州縣首領佐貳教職衙門則稿書用生員如生員不敷則監生童生亦可稱爲稿生清書另僱讀書安分之書手爲之亦稱爲寫生所以必改名爲生者以示改用士人之意緣書吏一項久已爲世詬病人既視爲不足重吏亦遂不自重而輕於犯法今一律改用士人優其名目則稿生寫生皆有顧惜廉恥之心化去歛法營私之習督撫司道知府衙門書吏向有飯食津貼各項銀兩即以撥充稿委寫生薪水之用州縣等衙門應就地籌款以 臣等所到各省論之其候補佐雜文理通暢心地明白而無差困苦者甚多足敷稿委之用查委員辦稿乃古人州郡有六曹掾屬之意生員繕寫乃鄉會試磨錄用生員之意似此辦法中等省分可用佐雜百餘人生員千餘人大省加多既可令候補人員練習公事又可爲本

省寒士開一生計實屬一舉數善惟此項裁除書吏皆係世業擬請按已滿吏加等給與官職並將其每年應得飯食津貼之數發給兩年令其自謀生理以示體恤州縣書吏令其自行的實如應新換稿生寫生等一時未能熟習或由各省自行的量情形分爲兩年裁汰惟各州縣戶房糧房藏匿收捐底冊以爲居奇最爲難法可惡今聞將裁汰必多抗匿不交甚且別造偽冊州縣按照串票原不難於清查但恐繁細當時於催科稍有阻礙擬請將各州縣戶房糧房應分爲數年裁汰由督撫體察情形一年先辦六七縣或十餘縣擇其易於清理者辦起如該吏有敢抗匿銷燬糧冊者卽行奏請正法俟辦有規模卽可一律推行永除要官賤民之弊矣至各部則例亦擬請 敕各部 刪繁就簡因時制宜以省虛文而收實效聖訓既省則以吏爲師者自無所藉口矣一去差役差役之爲民害各省皆同必鄉里無賴始充此業傳案之株連過堂之勒索看管之凌虐相驗之科派緝捕之淫擄白役之助虐其害不可殫述民見差役無不疾首感頌視如虎狼蛇蝎者差役擾民之事其報官者不過什之一其報官而懲辦者不過什之五師徒相承專習爲惡之事良由換官不換差役故根株蟠結黨羽繁滋旋革旋復雖有良吏只能遇事懲儆稍戢其暴而已而終不能令種種擾民害民之弊一概杜絕蓋官署事事需差州縣不肯久於其任勢不能鋤而去之別籌良法今欽奉 明諭令將差役白役分別裁汰此誠恤民圖治之要端也此事自

當轉飭有司欽遵實辦惟州縣之聽訟理刑催科緝捕等事不能不需人以供驅使若繁劇州縣人少亦不敷用例定役食無多不足以資餬養擬令州縣自行募勇以供驅遣大縣百餘名小縣數十名以供上項各種驅使此勇既由官選舉必自擇妥實可信之人去留在官自然不能把持習氣未深作弊不能甚巧但使本官約束嚴明即可不爲民害用勇之與用差利害相去懸絕如慮人地生疎其查案傳人自有鄉保可以指引如慮緝捕不知賊蹤儘可臨時購覓眼綫此項養勇之費應令各州縣體察情形就地籌辦如州縣以無款可籌藉口推諉亦尙有一辦法大率民間詞訟必有訟費少者錢三四千多者數十百千不待審斷一經過堂卽須先納此錢訟者久已視爲成例各處相沿皆有陋規諸案稍輕者卽已欣幸應令州縣照其舊規量爲裁減定一數目以示限制此外不准多索分文示民周知卽以此錢爲養勇之費民間樂於去差役之害未有不踴躍交納者大縣訟多簡縣訟少如不敷養勇之費再行就地勸募民必樂從惟繁缺州縣差役多至數百人驟行革除慮其流而爲盜應請限以五年次第裁革並給以三年役食令其各謀生計去此巨害則民氣漸紓教養有所施矣再者各國清查保甲巡街查夜禁暴誹奸皆係巡捕兵之責其人並非下流狠賤之人其頭目卽係武弁日本名爲警察其頭目名爲警察長而統之以警察部其章程用意大要以安民防患爲主與保甲局及營兵堆卡略同然警察係出於學堂故章程



其嚴而用意甚厚凡一切查戶口清道路防火懲別良莠請盜賊皆此警察局爲之開京城現擬設立巡捕將來外省自可仿辦茲擬令州縣用勇卽與用巡捕兵之意相近當於繁盛城鎮採取外國成法並參酌本地情形先行試辦以次推行警察若設則差役之害可以永遠革除此尤爲吏治之根基除莠安良之長策矣一恤刑獄轉輾劇之論戰也謂小大之獄必以情爲可戰之具遂一戰而勝強齊誠以獄爲生民之大命結民心禦強敵其端皆基於此非迂談也我朝列聖皆以哀矜庶獄爲心大清律例較之漢唐唐明之律其仁恕寬平相去霄壤徒以州縣有司政事過繁文法過密經費過絀而實心愛民者不多於是濫刑株累之酷罔罔凌虐之弊往往而有雖有良吏不過隨時消息終不能盡挽頽風外國人來華者往往親入州縣之監獄旁觀州縣之問案疾首蹙額譏爲賤視人類驅民入教職此之由蓋外國百年以來其聽訟之詳慎刑罰之輕簡監獄之寬舒從無苛酷之事以故民氣發舒人知有恥國勢以强夫中外情形不同外國案以認定中國案以供定若照眾證確鑿卽同獄成之例罕有不翻控者故外國聽訟從不用刑求重罪罕至大辟兩端中國遠難仿照然而明慎用刑不留獄大易之文圖土教職事周禮之典疑獄與衆共王制之法此皆中國古典醇章與西法無涉今酌擬九條一曰禁訟累每有訴訟差役家丁必索訟費視其家道以爲多少至少者制錢四千薄有田產者任意誅求不滿其欲者則詭曰案

未傳齊致官不能過堂卽恤民之官爲之酌減定數不准多索然一官所禁後任復然差役不革此弊不除至傳案株累最爲民害其中有原告誣讐者亦有吏役惡思本官者亦必須裁去吏役方能杜絕二曰省文法承審之例限處分太嚴而命盜案之報少必俟犯已供認而後詳報盜案之例限開參太嚴且必獲犯過半兼獲盜首方予免議而誣盜之事多諱有爲無諱劫爲竊諱多爲少各省從無一實報人數者命案罕報罕結則多私和人命及掩斃證人之事民冤所以不伸也盜案不早報不實報則花符已起而上官不知寇亂所以潛伏也二事關係甚大非寬減例處斷無禁絕拖延命案諱飾盜案之法至於上控之案其官吏偏私實有冤抑者自應澈究嚴懲乃近來上控者往往有訟棍主持意圖攀累訛索圖准而不圖審以致被告延宕日久而原告終不到案雖有原告兩月不到將案注銷之例而兩月之久拖累已多卽由省押發或已經逃匿或中途潛逃誣累害人情尤可惡應請 明定例章如上控案已經批發而兩月後並不到案者除照例注銷外並將上控之人通緝治罪以後再將此案上控者亦卽駁斥治罪究出架訟之人一律嚴辦並請將上控承審遲延之處分別情節辦理此亦省拖累之一端也三曰省刑責嚴扑呼號血肉橫飛最爲傷和害理有悖民牧之義地方官相沿已久漠不動心夫民雖犯法當存哀矜供情未定有罪與否尙不可知理宜詳慎况輕罪一告當時如法懲儆日後仍望其勉爲良民更宜存

其廉恥擬請以後除盜案命案證據已確而不肯認供者准其刑嚇外凡初次訊供時及牽連人證斷不准輕加刑責其笞杖等罪應由地方官體察情形酌量改爲羈禁或數日或數旬不得凌虐久繫四口重衆證外國問案專憑證人衆證既確即無須本犯之供然外國問案有專官刑律少死罪時刻間暇故可以從容研求監禁不苦故有確證者即不肯狡供且警察之法嚴密平口之良莠生業街巷蹤跡一周知故證據多問案皆係列坐證人從不替押故證人易中國州縣事繁素無警察而刑罰較嚴出入甚鉅旁人多不肯作證本犯自必圖倖免此刑求拖累之所由來也今惟有申明定律一法可以稍救此弊查例載衆證明白即同獄成不須對問然照此斷擬者往往翻控非經問官受賄即証人得贓以故非有確供不敢詳辦於是反覆刑求則有拷掠之慘多人拖累則有殃斃之冤擬請以後斷案除死罪必須有輪服供詞外其軍流以下罪名若本犯狡供拖延至半年以外者果係衆證確鑿其證人皆係公正可信上司層遞親提覆訊皆無疑義者即按律定擬奏咨立案如再京控上控均不准理夫既非死罪又有衆證兼有覆勘即使本犯不肯輪服不過意有不足斷不能全然顛倒據此定案則全案應訊人等可以省釋謀生夫爲一人之軍流而致妨廢多家之生業拖累無數之人命孰得孰失仁人良吏必有能辨之者矣此則省酷刑恤拖累之大端也五曰修監羈州縣監獄之外又有羈所又有交差押帶等名目狹隘汚

穢凌虐多端異疫傳染多致殃斃仁人不忍親聞等之於地獄外人尤爲痛詆比之以番蠻夫監獄不能無而酷虐不可有宜令各省設法籌款將臬司府廳州縣各衙門內監外監大加改修地面務須寬敞屋宇務須整潔優給口食及冬夏調理各費禁卒凌虐隨時嚴懲至羈所一項所以管押竊賊地痞及案情干涉甚重而供情未確罪名未定保人未到者定律雖無明文而各省州縣無處無之蓋此等案犯若取保則什九潛逃斷不能行若令迴往客店交差看守則勒索更甚無從稽考故羈所一項其勢不能不設查雍正三年刑部尙書勵廷儀奏監禁宜分內外內監以居重要人犯外監以居見羈輕犯並案內聽審人犯部議從之是今之羈所卽本勵廷儀所奏外監之意擬請 明定章程各處羈所務須整潔寬敞不准虐待亦不准多押至傳質者歸入候審所各省多已設立其餘差帶官店等事務須禁絕此事之實辦與否有房屋可驗不能掩飾六曰教工藝近年各省多有設立選醫所改過所者亦間教以工藝等事然行之不廣且教之亦不認真應令天下各州縣有獄地方均於內監外監中必留一寬大空院修工藝房一區令其學習將來釋放者可以謀生改行禁繫者亦可自給衣服七曰恤相驗凡有命案應相驗者驗尸棚廩官吏夫馬之費甚多均取之被告家不足則派之族鄰小村單戶則派之一半里外之遠鄰間有恤民之吏自備夫馬帳棚嚴禁差役科派然亦不過百之一二終無禁絕之法查四川有三費局由紳民

糧戶捐出一爲招解費一爲相驗費一爲夫馬費民甚便之行之已三十年此事自宜各州縣就地籌款務以辦成爲度仍責令州縣輕騎簡從不准縱擾違者嚴參八曰改罰錢贖罰之刑古經今律皆同有之惟其途尙隘查命盜案應按律治罪竊賊地痞棍傷人騙詐訟棍應量予扑責監禁藉以儆其悍暴昭示良民此數項應不准罰贖此外如戶婚田土家務錢債等類之案其中多係紳衿且兩造必係親族鄉鄰不宜苦辟過甚致本人有礙上進并使兩造子孫永爲智隳除按其曲直審斷外其曲者按其罪名輕重酌量罰贖罪銀若干以爲修理監獄經費舉實生監職員封職犯事罪不至革遣者除褫革外並罰繳修理監獄經費看管數月免其刑責似於化民諄俗之義有合罰繳之數令其詳報上司私罰及入己者罪之至近年流徒各犯率皆中途逃回否則在配不久卽逃由於沿途押解差役無多到配管束地保難信逃回以後肆惡更甚似此有名無實豈足以昭儆戒查近年盜匪各案外省多奏明改爲監禁數年擬請以後除重罪皆係重情照舊發遣外其流徒兩項由地方官酌量情節詳報咨部令繳贖罪銀若干以爲監獄經費改爲羈禁數年較本例所定年限少減則該犯有羈管之實沿途省解送之煩似亦兩有裨益九曰派專官監視一事固須屋宇廣潔尤須隨時體恤禁絕凌虐必有專官司之方有實濟吏目典史卑於州縣不能考察查各府皆有同知通判所司清軍鹽捕水利等事久成具文一無事事按今之

通判宋亦名通判或名簽判明名曰推官皆兼管獄囚訴訟故文人稱爲司李俗人稱爲刑廳批請著爲定章每府卽派實缺同知專司稽察各屬監獄之事同知不同城者派同城通判每兩箇月內徧赴所屬外縣稽察一次同城兼有同通者兩員分往一月稽察一次同城縣監十日稽察一次監獄不營凌虐未禁者准其據實聲明督撫臬司比照濫刑例參處稽察府監實成本道司監由督撫隨時委員稽察要之去差役則訟累可除免覓文法則命盜少諱延省刑罰則廉恥可培養重衆訟則無辜少拖累修監獄則民命可多全教工藝則盜賊可稀少籌驗費則鄉民免科派改罰錢則民俗可漸敦設專官則獄囚受實惠以上各弊例禁無一不周備而州縣無一能奉行若不酌改章例釐弊經費雖罄以文檄繩以憲分斷無實效必事事皆有確實辦法庶可以仰禱 聖朝尙德緩刑之治而驅民入教之思可漸除矣一改選法官來吏部用人名曰銓選銓者銓衡也選者選擇也自明季以來部選之官皆係按班依次選用查冊之外輔以掣籤並無考核賢否之法候選人員多係倩人投供必託部吏查探選期已近始行親自入都選缺到省必令赴任間有留省學習不過一年數月其中多有執袴子弟鄉僻寒儒罕能通曉吏事至本省情形則茫然每出一缺或應外補或應內選或一咨一留或兩咨一留班次糾紛章程繁細各官但算計得缺之遲早班次之通塞心思誠解日趨鄙俗竊擬略爲變通以後州縣同通統歸外補無論正途

保舉捐納皆令分發到省補用試用令其學習政治上官亦得以考核其才識之短長遇有缺出按照部章應補何班卽於本班內統加酌量擬補不必拘定名次惟到省未滿一年者除本班無人外不得請補查部定委署章程只分三班一正途一委用一試用委用卽勞績也就應用各班之中酌量遴委不必挨次如有重要難辦之事並班次亦可不拘此章最爲簡易通達既有範圍可守亦可因地擇人今卽略仿其意或謂有外補無內選則吏部之權漸輕竊謂不然分發到省之初部臣查其合例核准者始行驗看奏請引見發往不核准者卽駁斥不行外省請補之時部中視其合例者准不合例者駁其權仍在吏部夫使今日吏部選缺章程果能裁量參酌分別進退因時求才因地擇人與銓選之義名實相符豈敢輕議更張無如選人雲集與部臣從未謀而月官之卷但寫履歷無事可試無才可見無文可考無勞可獎雖有山濤之明徐勉之正慮承慶之恕王珣之公無所用之則何如內外互相考核歷試然後授官之爲愈乎蓋同一按照部章外補則於遵章之外又多一考核酌量督撫藩司所擬酌補之人縱不能一一精當亦必可十得其五公論具在斷不能概係偏私況緊要之缺自道府以至州縣皆由督撫酌補酌調部選者皆係中簡之缺豈有酌補緊要缺則督撫皆秉公酌補中簡缺則督撫皆徇私乎必不然矣照此辦法則所用皆係熟習地方情形之員又有鼓勵人才之具於吏治實有裨益至道府兩項應查照向章

如有補選相同者其咨部歸選之缺應用候選人員者則改歸外補應選實缺人員者則改爲請 旨簡放所有實缺京官向章應選道府者亦請改爲 記名簡放如此則內外皆有擇人之實效矣抑 等吏有進者古人稱吏部之善曰簡要清通擬請 敕下部 將各項班次量加刪減歸併總以宏綱疎目爲主俾候缺各官但思濯磨自效而不以計缺趨避分其心思庶幾吏治或有起色乎一籌八旗生計京外八旗生齒日增餉額有定且銀價漸低物價日貴 國家雖歲費鉅款而旗兵旗丁等不免拮据之憂殊鮮飽騰之樂自咸豐軍興以來江寧杭州鎮江乍浦漳州等處駐防受禍甚巨去年聯軍之變則京旗受害亦深此不可不急思變計者也伏思中國涵濡 聖化二百餘年九州四海同爲食毛踐土之人滿蒙漢民久已互通婚媾情同一家者蓋不疑逆以來南北各省文武軍民團練其竭忠戮力效命行間者旗民皆同並無區別況方今中外大通乃 天子守在四裔之時無論旗民皆有同患難共安樂之誼然則兩京二十三省凡有血氣者皆是拱衛 國家之人于城腹心原不必專恃禁旅況八旗近來文才日盛而武勇漸遜於前迥非 國初之舊若猶令豐鎬子弟沿襲舊制坐困郡城外省駐防株守一隅局於兵額非所以昭同仁而規久遠也溯查乾隆以至光緒年間滿漢大臣言官屢有上疏籌及旗人生計者大率皆以出外屯墾爲言特是荒地惟關東口北爲多內地罕有且官家兵籍亦未必皆習於農故屯墾一



說迄未能大加推行竊謂朝廷養人不必指定何項生計但宜使之有自謀生計之才擬請將京外八旗餉項仍照舊額開支惟將舊法略爲變通寬其拘束凡京城及駐防旗人有願至各省隨官遊幕投親訪友以及農工商賈各業悉聽其便僑寓地方願寄籍應小者鄉試者亦聽其便准附入所寄居地方之籍一律取中但註明寄居某旗人而已有駐防省分或即附入駐防之額其自願歸入民籍者必其自揣文藝可與衆人爭衡卽不必爲之區別寄籍者卽歸地方官與民人一體約束看待惟出京寄籍自謀生理之人其錢糧卽行開除不必另補但將馬步甲兵撥定一至少減至若干之額省出餉銀卹米卹以專充八旗廣設學堂之費士農工商兵五門隨所願習惟習武備須擇年在二十歲以下者如本係當兵者既入學堂則尋常舊例操演勿庸再到以免分其學堂之目力其習武備者留以供禁旅之用習他項者令爲謀生之資所學未成不能營生之時餉項照舊給發五年以後省餉日鉅學堂日增十年以後充兵者可以禦侮則不愚弱改業者各有所長則亦不愚貧矣一裁屯衛查全漕改折計省出耗折兌運局棧員紳修河開壩駁船倉庫各費可歲減二百餘萬數十年來言者多已議及戶部屢經咨詢查江浙漕糧皆係臨起運時購買海運則於上海買米交商輪河運則於汜水鎮購米交船戶在民久已折徵在官並不折解剝船有攤水費變之弊花戶有盜賣回漕之弊暗虧尤多旗兵得米盡以易錢京官倉米皆買北

稻然則漕運一事種種有名無實亟應設法變通查有漕各省屯田本爲贖運軍而設各衛所守備千總本爲徵屯餉押漕運而設今日無論折漕與否運漕皆係輪船民船運軍久無其人衛官一無其事而屯田屯餉弊竇尤多一衛所屬屯田有隔在別府者有跨在別省者衛官並不知其田在何處數有若干其冊皆在該衛數書吏之手至於荒熟蠲歉更無影響可尋衛官但向書吏索取年例陋規而已此等積弊各省皆同臣等查之甚悉計十年之中江南湖北各衛官以爭利謀缺訐訟滋鬧之案甚多謬妄離奇直不知官常爲何事不文不武形同贅疣若屯田屯餉改歸所隸州縣徵收則每年蠲歉完欠皆有可考查前明屯田立法之始本係官田給發運丁承種納租故定例准典而不准買然相沿數百年來輾轉典當久已屢易其主視同民業屯戶既係用價所置此時自不便繩以舊法但令其報官稅契將屯餉改爲地丁將屯丁運軍之名編審之例永行刪除衛守備衛千總等官一概裁罷改爲營守備營千總分別補用清弊遇事可與各糧道州縣行文往來亦不必有此衛官民間買屯田者既享世業之利又除運軍編審之累受益已多若令其於舊章屯餉之外每畝酌加報効銀二分總計各省屯田二十五萬餘頃可成增銀五十萬兩卽有災緩所減無多再益以裁省衛官之費實爲鉅款此項係裁屯裁衛所得擬請卽以撥充加增大小京官俸廉之用若於清理衛田一事尙可多籌應請一併解充京官俸廉省枝官以贖實職

名義尤屬相宜一裁綠營綠營之無用自嘉慶初年川楚教匪之亂而已蓋自髮捻之亂而大著故大學士曾國藩在直隸創為練軍之義意在加餉併營以冀整隊勤操誠亦苦心救弊之術各省仿而行之然而餉項雖加習氣未改親族相承視同世業每營人數較多更易挾制滋事身既懶弱多操數刻則有怨言性又不馴稍施鞭笞則必譁謀將弁不能約束遑論教練至於調派出征則聞風推諉其不能當大敵禦外侮固不符自即土匪鹽梟亦且不能剿捕惟直隸練軍皆係勇營規模其中多有外省勇丁故尚可  
用此外各省積弊大率相同至於原營零星之兵飢困無聊大率皆兼工藝小販以資餬口尤為無用歲  
糜巨餉則可惜干城無具則可憂三十年來以裁汰綠營為言者不止數十百人自光緒十一年奉 諭  
旨令裁汰綠營光緒二十二年又奉 上諭裁汰綠營各省雖已分別裁汰然現存者尙復不少合計各  
省原營額餉挑練加餉歲費餉銀米馬乾照光緒十一年八月二十二日 諭旨綠營兵餉一千五百  
萬兩之數核算此時尙需銀一千萬兩以外物力艱難年年巨耗真不知何所底止也或謂兵勇同是一  
人何以綠營不能教練不知勇營統帶營哨各官可以隨時撤換最能委用不拘資格勇丁可以隨時革  
補重者施以軍法愚劣疲劣可全裁此營另募新營若綠營官由選補兵皆土著兵非弁之所自招弁非  
將之所親信既無恩義自難鈴束以傳會之官馭世業之兵亦如州縣之於吏役欲其整飭變化服教從

風此必無之事也況綠營將弁皆染官場習氣官弁且不易教況於兵乎或謂綠營雖無用而難遽裁可改爲巡捕兵以資彈壓防緝不知綠營官弁兵丁層層積弊已入膏肓既甚驕頑又極疲弱欲望其練成可戰之兵固斷無其術卽改爲警察不惜廢曠誤卽案擬生事亦如差役地保而已然則既不能整頓變化而用之自非裁汰不可特是裁汰之要義有二一則宜籌從容消散之方一則宜籌抵補彈壓地方之具夫裁兵之議已經多年然至今未能多裁者則以欲求近效而多裁遂致牽制而不能裁竊思惟有多分年限漸次裁汰一策則無弊而必有成擬請將各省綠營不論挑練之兵原營之兵不分馬步戰守限定每年裁二十分之一計百人裁五統限二十年裁竣應裁者每名給恩餉一年責成各省督撫藩司每年餉銀糧米就現在應發之數於二十成中扣發一成其何營應開除幾名令各該營自行按數開除蓋無論綠營勇營每百人中一年之內斷無不出缺數名之理或病故或革退只有多於五名者斷無更少於五名者或謂卽明定一章以後缺額不補自然日久減盡不知若聽各營自行報出空額則永遠推延捏名接充永無開革病故者惟有計成扣餉不發最爲簡易而分爲二十年之限尤屬從寬銷除有漸改業有資斷不至更有他虞惟各省間有不便裁汰者如湖南鎮鎮乃改土歸流之地並無土著農民其地除苗產外土地皆係屯田民人皆係兵籍而入伍食糧爲業其兵亦健樸可用從前屢立戰功綏靖

鎮亦然。是以光緒二十三年裁兵案內聲明鎮鎮毋庸議減綏靖鎮只裁一成擬請將此兩鎮兵額不再裁汰。但將綠營改爲勇營一切營制汛地名目章程統飭辰永沅靖道會同該兩鎮酌定。將綠營舊日故套空文攤扣積弊永遠革除。統照營勇辦理。此外他省如實有與該兩鎮相似者應由該省督撫酌辦。直隸練軍應由直隸督臣酌辦。或謂爲期過緩。所省無多。不知綠營規制始於前明。以五百餘年養成之痼疾若能以二十年掃除之。卽已非易。假如自光緒十一年卽定爲二十年裁汰之議。今已歷十七年。行將告竣矣。計十一年以後卽可歲省五百萬。二十一年以後卽可歲省一千萬矣。惟是此項省出之餉只能改爲養緝勇設警察之費。不能指爲充裕庫儲之計。蓋精練備戰之營只可屯劄省城及要隘重鎮。兩三處斷不宜各處分劄。又蹈營汛之失。省外府縣亦未便聽其空虚。可卽以此項省出之餉酌設緝捕勇營。派赴外府擇要分防。并設警察之勇。歸州縣調度。不過改募勇丁。則整飭去留其權在地方官。勇可隨時裁募。并可隨時更換。於弭亂安民既有實際。而經費可免另籌。此卽與新增巨款無異矣。至於武職大小各員缺則擬請概勿裁汰。滿以後無論營勇如何整飭操法如何改練。要必有管帶之統領營哨各官。又武備學堂教練已成之學生。必有獎拔官階以爲出路。而資效用。又營弁剿匪捕盜著有勞績者及操防出力者亦必有武職升階以爲獎勵。然則綠營已裁而武職之缺不能裁者。至二十年以後則從前各

路軍營立功者無論大小將弁久已彫謝無存其實缺提鎮大員既數 特簡且品秩已崇資序已深除才能統軍帶勇者自宜任用外其餘卽不能帶勇者但用其缺擬懇 欽加榮銜優其禮貌照舊支領俸廉如日本元老院之例至該員身故而止至實缺副將參遊都守等官才能帶勇者改隸勇營不能帶勇者卽開其缺如有識字曉事者准其呈詞降等改就文職用以知府同通佐貳等官如副將改用知府以下遞抵千把改用雜職等深知外省情形緣營將弁若得改爲知府同通佐貳無不欣幸樂爲其開缺而不能改文者如係穩練勦番之員可令供餉項差委如緝捕轉運隄防等事其平庸無能者亦可加以升銜量給薪水蓋爲勦口營弁別開自效之仕途卽可騰出武缺以授有用之將士其候補武職能改文者或與實缺武職同或再降實缺武職一等不能改文而才具又無足差委者從優資遣回籍若照此次所奏設文武學堂罷武科兩條辦理二十年以後凡爲武職者斷無不讀書識字之人亦無不曉兵事不能帶勇之人其僅存候補勦口緣營之將弁蓋亦寥寥每歲需費無多不過十年卽已漸次減盡矣似此分別位置變通有體恤緣營將弁之方卽可無礙整軍經武之政蓋緣營兵之不能裁皆由於武官之把持鼓勵必將武職官弁設法體恤使其得所自無窒礙矣總之一省必有實缺武職若干員俟緣營兵漸少以後則通省爲兵者止有勇營之一途其駐紮地方責成所在皆非緣營營汛之舊應如何更定營名

以符名實即以現帶勇營之員充補抑或酌留數缺以位置他項武職之處統俟隨後從容籌議一簡文  
法恭讀此次 諭旨其要義有二一曰簡二曰寬實與聖經思敬行簡寬則得衆之旨相合欽服莫名竊  
維立法所以防弊而任法適以生弊誠以文法過繁則日力精力皆有不給必致疲勞於虛文而疎略於  
實事吏議過密則賢者苦於束縛不能設施不肖者工爲趨避仍難指摘以致居官者但有羣法救過之  
心思並無憂國愛民之誠意況方今事變離奇動關大局卽晝夜精思破格振作猶恐無濟若再困之於  
煩苛則會之問則 國家利害安危無暇籌及矣夫衡石程書專用督責奈之所以亡也斷難爲樸吏治  
蒸蒸漢之所以興也噫以察而亂唐以寬而治宋以繁而敗金以簡而勝此治國治軍得失之定論也簡  
文法約有三端一曰省虛文凡部院文移外省公牘多有陳陳相因無益實政者有冊籍浩繁無關利弊  
者有冗繁細故往返駁查稽延時日者有循習具報出結並無實事者此類不可殫述擬請 飭下京外  
各衙門通行澈查酌量省罷至於無謂儀節徒致廢務妨要者亦請查核酌改從簡一曰省題本查題本  
乃前明舊制既有副本又有貼黃兼須繕寫宋字繁複遲緩我 朝雍正年間 諭令臣工將要事改爲  
摺奏簡速易覽連勝題本五十年來各省已多改題爲奏之案上年冬間曾經 行在部臣奏請將題本  
暫緩辦理此後擬請查核詳議永遠省除分別改爲奏咨一曰寬例處范仲淹之言曰士大夫公罪不能

無私罪不可有洵爲名論方今吏議繁密京外各官殆無一人無一日不干吏議者而州縣爲尤其治民之本全在州縣救過不暇何暇論及教養乎牽絀既多於是遇事諉卸多方彌縫上官亦知其情多爲難不肯苛求姑從掩覆既明知爲無益勸懲之事何必存此虛文應請 敕下吏兵兩部都察院查核處分別公私輕重量加寬減剔除如此則臣下之於 朝廷保屬之於上官可以進實言辦實事矣以上十二條皆中國積弱不振之故而尤爲外國指摘詬病之端臣等所擬辦法或養民力或澄官方或作士氣前人論及此者多矣特以誤於弊去泰甚之言恍於諸事更張之謗律令文告都成具文小有設施不規久違今日外患日深其樂因循務欺飾者動以民心固結爲言不知近日民情已非三十年前之舊羨外國之富而鄙中土之貧見外兵之強而疾官軍之懦樂海關之平允而怨滄局之刁難誇租界之整肅而苦吏胥之騷擾於是民從洋教商挂洋旗士入洋籍始由否隔變成渙散亂民漸起邪說乘之邦基所關不勝憂懼必先將以上諸弊一律剷除方可冀民心永遠固結然後親上死長禦侮捍患可得而言矣仰懇 聖明裁察施行以爲自強之根本又奏 臣等籌擬興學育才四條及整頓中法十二條業經兩次會同奏陳在案竊維取諸人以爲善舜之聖也多聞擇其善者而從之多見而識之孔子之聖也是故舜稱大知孔集大成方今環球各國日新月盛大者兼擅富強次者亦不至貧弱究其政體學術大率皆



累數百年之研究經數千百人之修改成效既彰轉相仿倣美洲則採之歐洲東洋復採之西洋此如鑒有經驗之方劑路有熟遊之圖經正可相我病證以爲服藥之重輕度我筋力以爲行程之遲速蓋無有便於此者今蒙特頒 明詔鑒前事之失破迂謬之談將採西法以補中法之不足 虛己之衷恢宏之度薄海內外無不欽仰翹首拭目以觀自強之政矣顧西法綱舉更僕難終情形固自有異同行之亦必有序第 臣等謹就切要易行者臚舉十一條一曰廣派遊歷二曰練外國操三曰廣軍實四曰修農政五曰勸工藝六曰定礦律路律商律交涉刑律七曰用銀元八曰行印花稅九曰推行郵政十曰官收洋藥十一曰多譯東西各國書大要皆以變而不失其正爲主謹爲我 皇上臚陳之一廣派遊歷歐美強盛窺伺中國已百年矣中外通商交涉日繁已五十年矣然而自強無具因應無方馴致妄開巨衅幾危大局者則皆坐見聞不廣之一病於各國疆域政治文學武備茫然不知同治季年雖已派遊歷設駐使遣學生而迂陋謬妄之人聞出洋者之言則詆其妄見總署之官屬則惡其汚於是相戒以講洋務爲諱甚至上年夏間京外大僚猶有謂洋人不能陸行者有謂使館教堂既燬洋人即從此絕跡者銅鐵至此致召防危誠可痛矣論今日育才強國之道自以多派士人出洋遊學爲第一義惟遊學費繁年久其數不能過多且有年齒較長不能入學堂者有已經出仕不願入學堂者欲求急救之方惟有廣派遊歷之一

法觀其國勢考其政事學術察其與我國關涉之大端與各國離合之情事回華後將其身經目覩者告語親知展轉傳觀自然羣迷頓覺急思變計惟遊歷之員淺學不如通才之有益庶僚又不如親貴之更有益蓋淺學徒眩其新奇通才乃得其深意親貴歸國所任皆重要之職事所誠皆在朝之達官故其傳述啟發尤爲得力考之經傳則公族世卿時通盟聘徵之近事則俄儲德藩接踵東來可見此舉爲覘國問政之要務擬請 敕派王公大臣以及宗室後進大員子弟翰林科道部屬各項京官分赴各國遊歷詢其願往者請 旨遴選酌派不願者聽歸國時察其實有進益之員遊歷一年者酌獎遊歷三年者優獎惟西洋路遠費多東洋路近費省遊歷西洋者其獎擢名次在遊歷東洋之先其未經選派自備資斧遊歷者聽歸國時一體考察給獎獎者量材任用以後新派總署堂官章京海關道員出使大臣及隨員必選諸曾經出洋之員惟遊歷人員才識高下不同未必人人皆有實濟故必須多選數十員或百員陸續派往以備將來選擇拔擢經費雖多萬不可省至此後各省督撫司道府始無一衙門無交涉事件者若仍前拘墟固執全無考究必致因應失宜卽京城各部院雖各有職司然不通外情則應事建言動多隔膜此非多儲通才無從供用並擬請明定章程自今日起三年以後凡官階資序才品可以開坊缺送御史升京卿放道員者必須曾經出洋遊歷一次或三年或一年均可若未經出洋者不得開坊缺送

御史升京卿放道員如此則自備資斧遊歷者必多通才目衆而經費不勞官辦矣至外省府廳州縣諮  
悉交涉者尤罕以後內河行輪聯單辦貨入山開礦傳教遊歷勢將各縣皆有尤恐動滋事端并請 敕  
下各省督撫選派官員出洋遊歷實缺官願往者免開其缺遊歷一年者外獎三年者奏請內獎經費准  
其開支自備資斧若從優請獎其獎擢名次亦以西洋東洋爲先後惟遊歷實效以徧遊歐美日本爲全  
功而以先遊日本爲急務蓋遊歷者若無繙譯相隨障目汎覽仍無所得東瀛風土文字皆與中國相近  
華人僑寓者亦多繙譯易得便於遊覽詢問受益較速回華較早且日本諸事雖仿西法然多有參酌本  
國情形斟酌改易者亦有熟察近日利病刪減變通者與中國採用尤爲相宜若西國興盛之初皆由  
遊歷而起求新地涉冰洋探南北極窮幽極遠備歷艱辛於是見聞日廣智慧日開遂成富強之策今日  
歐美各洲無一水不通輪船無一國不通鐵路商旅如織學校如林有繙譯爲之傳達有駐使爲之照料  
較之西人之遊歷甘苦迥殊取益尤易觀其實政觀其實效見其新器求其新書凡吏治財政學制兵備  
一一考詢記錄攜之回華以供我之採擇而仿行焉開聰明而長志氣無過於此無速於此今 朝廷銳  
意求治採取西法夫西法非數言所能盡其要領亦非耳食所能究其異同出洋之員既多則互相發明  
利弊自見故今日欲起積弱而抗強強其開此第一局鑰必自遊歷始一練外國操伏讀 諭旨有云

懿訓以爲取外國之長乃可補中國之短夫外國之所最長者蓋莫過於兵矣古聖人師蟻爲陣卽繇爲舟取益無方正見宏大兵事一端尤須知己知彼相機因應故吳欲伐楚則學車戰晉欲敗狄則改步卒漢伐匈奴則用越騎晉平孫吳則造樓船皆倂彼之長補我之短 聖祖仁皇帝征三藩則用西洋人南懷仁鑄紅衣大礮至今礮上尙鐫有南懷仁之名 高宗純皇帝征金川則於香山仿造石礮令禁軍習攻礮之技要皆用外國之利器效敵人之專長此則 神謨武烈兼採衆長不罔成見之明效也西國自百年以來日與鄰強相角故兵事講求最精一一著有成書愈推愈密迥非野戰之比紀律既肅火器尤精至於測量繪圖人人通曉工程輜重醫藥事事周詳查二十年來各省練習洋操屢奉 諭旨乃近年忽有人創爲西操不如中操之空言鎖礮不如刀矛之謬論不知中國向無快鎗快礮地雷電綫行軍鐵路等事若只用綠營勇營老陣並不知此各項器具名目形式用法平日何從操練臨戰之時敵鎗敵礮發於二三里六七里之外刀矛只及五步之內不待敵軍迫近而已全軍盡沒矣與之交戰且不能而況於取勝乎查營制操法歐美各洲各國大率相同其略有參差者不過微末小節良由各國相尙以兵故推求極精不能改易試思環球各強國其練兵皆同此一法而謂中華兵力最弱之國反能別創一器一法以取勝此事理之所必無者也此皆由舊日將領於新式快鎗快礮既未深諳於西法營陣濠塹測

繪諸事尤未講習且年力已衰習氣已深養驕畏難不願降心考究其甚不肖者更以西法營制嚴明不能作弊故平日則以空言欺人臨陣則倉卒奔潰前際其在可謂創鉅痛深相應請 旨通諭中外統兵大臣督撫提鎮嚴飭各營將士必宜洗心滌慮趕緊請求練習外國操之法斷不可故見自封再誤國事滑惰搪塞者黜之但學皮毛不解實用者撤之惟是欲求實用必須將東西洋武備諸書詳切講明一一照辦斷無國莽捷獲之方查各國武備學堂其教將練兵要指約有十二一曰教士以禮使知有恥自重之法一曰調護士卒居處飲食之法一曰講明鎗礮彈藥質性源流之法一曰鎗礮縫路取準之法一曰掘濠築壘以避鎗礮之法一曰馬步礮各隊擇地借勢之法一曰測量繪圖之法一曰隊伍分合轉變之法一曰守衛偵探之法一曰行軍工程製造之法一曰籌備行軍衣糧輜重之法一曰行軍醫藥之法上自統領下至哨弁人人皆須通曉惟西人兵制營中從無用教習之說營哨官皆係讀書通文理之人既由學堂教成而又入營練習一兩年者始能派充若統領則必須由營官而又入大學校學習數年始能擔任故學堂有教習而營中無教習其臨敵調隊擇地進退皆聽命於營官施放鎗礮之遲速指示表尺之遠近皆聽命於哨官而營哨官又豫先稟承大略於統領其平日操場之演習講堂之教授皆係統領營官哨官兵勇節節指授親口自傳口令故統領所知所能必勝於營官營官必勝於哨官哨官必勝於

兵勇方能勝任若統領營官懵然不解專恃教習教操則雖有教法而無權力平日操練斷無進益隨處仍是營哨妄行調度所學全歸無用查日本設有戶山學校因日本早年將士素以長刀礮劍爲長不以火器西操爲善故特設此學使苗日將領常至其中看新法將兵之操練討論如何變通改練之法討論既久遂漸知損棄故技中國欲開取宿將偏執空談之弊此舉亦可仿行能領悟講求者用之不能改悟者只可任以緣營緝捕彈壓之事不宜使帶精練備戰之軍此時改章之初統領營官但須粗通文義哨官但須略能識字數年後武備學堂人才漸多則非學堂出身者不得派充統領營哨各官方能一氣貫注至西人平日操練時體恤指授之實功臨戰應敵時鼓勇決勝之關鍵注重全在哨官此項人才尤宜精選總之今日練兵最急練將尤急欲得精兵必取年在二十歲以下者教之欲求良將大率必取年在三十歲以下者教之取年在四十歲以下者選擇而酌用之若震於宿將之虛名則武備永無起色臣等源荷 厚恩當此創鉅痛深之日灼見練兵一端必須改弦易轍乃可圖存不敢不力破迂妄之說免其欺誑 朝廷而終誤國家也抑練兵尤有要者外國於其都城皆設有專管籌畫兵事之大臣英法德等國名曰總營務處日本名曰參謀本部略如宋人樞密院之意專掌全國水陸兵制餉章地理關隘操練法式儲備糧餉轉運車船外交偵探等事平日之豫籌臨時之調度皆以此官掌之與今日之兵部但司

冊籍者不同與軍機處之內外文武大政無不統管者亦不同蓋諸事釐辦則軍儲備專官經理則考核精全國之軍歸一衙門綜理則餉械操法事事盡一大臣督察則外省廢弛不辦者不能隱飾中國欲練精兵非設此衙門不可其章程請 敕出使大臣李盛鐸向日本索取譯寄採擇用之惟其參謀部總長須深於兵事起自行間者方使任之並非僅用親貴資格中國欲設此官自宜先擇深於外國兵制操法者方爲有益若仍以數目軍營諸將之議論爲衡恐反多掣肘而害事矣中外文武大員能語此者恐不易得擬請在京先設一參謀館訪求各國兵書選四五品以下各官令其訂採擇隨時函詢日本參謀部務須盡解其精意並隨時詢商外省督撫察議允協編纂成書再由政務處奏請 通飭遵辦方免窒礙此則慎重而求賢之策也一廣軍實和局雖定戰備不可不修我無戰具則各國將內逼矣經費雖艱軍械不可不製不製軍械則將士永不知今日戰陣爲何事矣大廠自雖多開小辦必須努力現在外洋軍火既禁兩年無從購辦江鄂兩局豈能供海內之取求此後江鄂兩局除加功精究籌款擴充並於廠內設立學堂以教員弁外并擬設法籌款自造鎗機礮機彈機以待各省購用學製庶免專恃外購仰他人之憐恩增中土之瀾厄至直隸各局自必設法修復擬請將廣東山東四川三省製造局極力擴充其餘南北各省皆令設法籌款量力各設一製造局款多則兼鍊鋼造鎗造彈三事款少則兼造兩種再少

則只造彈一種若慮機爐大工費鉅則鍊鋼爐每日出鋼一噸半噸者亦可鎔機每年出數百枝者亦可鎔彈機則每年出一二十萬者亦可蓋鎔廠一事其用甚急其理甚精深通其難近年各將領暗曉新式鎔廠者實不甚多白人不能一二文員則千人中不能一二此等所考校而深知者若不令切實講求則械彈漸銹零件損失全然不覺藥力彈路相時取準全然不知至於修理機簧開花引信更所不解平日不能操臨戰不能用故沿邊省分必須每省量力各設一局瘠瘵省分或兩省共設一局但令小其規模即可並由各省派遣武員來江鄂兩省製造局學習如能派人赴日本各國學習尤善庶幾督撫及將領文員皆可切實考究俾知新械之精價值之真製造之難練習之不易平日則不致損傷有事則熟諳施放將弁之明昧可以考核戰事之難易可以曉悟且一年數百枝十年則數千枝求艾雖遲終勝不舊至於自造製械之機尤爲防患塞漏之要著等當設法籌款奏明辦理此不特儲械之長策兼亦練兵之實際也一修農政中國以農立國蓋以中國土地廣大氣候溫和連勝歐洲於農最宜其種植之無不宜爲全球所不能及故漢人有天下大利必歸農之說夫富民足國之道以多出土貨爲要義無農以爲之本則工無所施商無可運近年工商皆闕有進益惟農事最疲有退無進大凡農家率皆愚昧愚拙不讀書識字之人其所種之物種植之法止係本鄉所見故老所傳斷不能考究物產別悟新理新法情



陋自甘積成貧困今日欲圖本富首在修農政欲修農政必先興農學查外國講求農學者以法美爲優然譯本尙少近年譯出日本農務諸書數十種明白易曉且其土宜風俗與中國相近可仿行者最多其間卽有轉譯西國農書一切物性土宜之利弊推廣肥料之新法勸導獎勵之功效皆備其中查光緒二十四年九月會奉 旨令各省設農務局擬請再降 明諭切飭各省認真舉辦查漢唐以來皆有司農專官並請在京專設一農政大臣掌考求督課農務之事宜立衙門頒印信作額缺不宜令他官兼之以昭示 國家敦本重農之意實成既專方有成效卽如我 朝官制於禮部外另設樂部其意可師京師農務大學校卽附設農政衙門之內其衙門宜建於空曠處所令其旁有隙地以資考驗農務實事之用勸導之法有四一曰勸農學學生有願赴日本農務學堂學習學成領有憑照者視其學業等差分別獎給官職赴歐洲美洲農務學堂者路途日久給獎較優自備資斧者又加優焉令其充各省農務局辦事人員一曰勸官紳各省先將農學諸書廣爲譯刻分發通省州縣由省城農務總局將農務書所載各法本省所宜何物一一擇要指出令州縣體察本地情形勸諭紳董依法試種年終按照飭辦門目填注一冊土俗何種相宜何法已能仿行何項收成最旺通稟上司刊布周知有效者獎報耑報每縣設一勸農局邀集各鄉紳董來局講求凡蠶桑棉林木畜牧等事擇其與本地相宜者種之養之向來不得法

者改易之貧民無力補助之資本種養得法者官賞以酒肉花紅數年之後行之有效紳董給獎中者獎以督撫匾額上者獎以銜封出力兼捐資者獎以御書匾額地方官有效得獎者加級准其隨帶公單可從寬免其最優者獎實在升階地方官不舉辦農政者照滿職例參革一日導鄉誦各項新器鄉民固無從聞知僻縣亦難於購致宜由各省總局多方訪求籌款購辦仿製昔齊桓公獻戎菽宋仁宗求占城早稻漢武帝令大司農從道造便巧田器皆農務宜求嘉種新器之明證應先於省城設農務學校選中學校普通學畢業者肄業其中並擇地爲試驗場先行考驗實事以備分發各縣爲教習並將各種各器發給通省令民間試辦先則概不取價有效則略取價值務令極廉其試辦之法先其通用者後其專門者如請求各種肥料仿造各種風車水車去害稼各蟲每年換種各物以助地力之類先其易者後其難者如山鄉勸種蕎麥芋水漂種葦片園種稗之類先其本輕者後其費鉅者如種樹先榆柳果實後松杉畜牧先雞鴨牛羊後驢馬之類先其保已有之利者後其開未見之利者如緊病蠶繭製茶求棉種之類先其權利速者後其見效遲者如種蒲桃取酒桐柏取油種棧取腦先求蜂種求魚種爲後之類一曰墾荒緩賦稅今日籌度支者多以墾荒爲言夫墾荒而實以升科此荒之所以不墾也計髮捻平定以後已四十年晉豫大祲以後已二十年生齒之蕃已復其故平原沃壤江岸沙洲大率皆已墾植無

遺其因虧本爭訟而荒廢者僅千百中之一二所謂荒者不過官吏捏飾蒙民隱報實係未墾者深山之  
廢谷沿海之斥鹵而已墾山地者人勞利薄又以村孤人少時有不虞故開闢有限墾海灘者捍潮變錄  
費多效難人煙稀少守望不易故聽其荒廢然而材木之利必資於山統計中國全局仍是山嶺多於平  
地至沿海北起榆關南迄通海延袤二千餘里若山嶺聽其爲榛莽海濱聽其爲斥鹵實爲可惜今日欲  
興農務惟有將墾荒升科之期格外從緩而又設法以鼓舞之能開山地者報官給照寬期升科多開者  
種雜糧至十石以上種樹至一千株以上酌予獎賞查各省高山無論多土多石皆能種樹真係不毛者  
甚少故歐美各國從無無樹之置山而考課林木之實在有效與否尤爲顯易此事宜責成州縣由總局  
委員依限往查其山上有無樹木一覽而知不能掩飾如此則山地之利開矣墾海灘者亦報官給照資  
本較鉅升科之期尤須從寬種雜糧植草木俱聽其便斷不必強令開作稻田並擬採用徐寅明之說一  
人能開若干頃者獎以職銜封典如此則海灘地之利開矣至於沿江沿河沙洲皆係沃壤私墾者尺寸  
無遺隨年增長貧民畏坍漲之無常而不敢報勢豪貪無糧之腴壤而不盡報往往爭訟輻輳械鬪繁滋  
今宜查明實數除已報墾納糧者不計外亦造冊給照寬期升科卽以此田作爲試驗農學新法之地卽  
責成原墾之人自願照新法試行者呈明願種何物或種美國肥大之棉或種代蔗造糖之西國葡萄美

國蘆粟等類或仿照美洲牧牛牧豕機器耕田之法以及各種相宜之種植畜牧因洲田皆係水濱大地故於西法農務相宜數年以後官督紳董查明有成效者卽給予管業且予獎賞苟且欺飾並不遵行者其地本係官地罰令入官如此則洲地之利開矣所有種種畜牧各物無論山地海灘地洲地凡係新增名目運往各處十年之內概免釐稅地利既闢農學之效既見風氣一開仿行必衆其爲益於國家者宏且遠矣豈在目前徵糧納稅之微末乎此外則沿海有種蠶植靛之法內海有捕海魚採海味之利本多而利厚外國最爲講求注意近年反仰給東洋坐失己利應責成該處州縣勸集公司舉辦紳富助資借本與該公司者分別旌獎至東三省地方廣闊土脈最厚荒地尤多然必須力強資饒才能聚衆奮方能前往開墾非零星農民所能濟事擬請特定章程一人能開田若干頃者從優獎以實官紳富助資借本者分別旌獎以期鼓舞此亦實根本愚盜賊之計也再蒙古生計以游牧爲主近數十年來蒙部日貧蕩籬疎薄亦請 敕下蒙古各部藩王公暨該處將軍大臣酌擬有益牧政事宜奏明辦理至向章每年內地各省出口賣馬者須在兵部請領馬票進口後仍須赴部烙驗章程甚密道途亦多周折購馬之費既多則馬價必求減省故口馬之銷路不旺查北省耕地兼用馬運載多用騾若內地馬多於農事亦有裨益方今蒙古之與腹省情同一家似不必多設限制擬請 敕部酌議將請領馬票之例量加改定販

馬入口貿易商民出口購馬者均聽其便但令販馬商民於本省報明咨部並由各口具報數目以備稽核則口馬之銷路既旺而蒙古生計亦可稍紓矣一勸工藝世人多謂西國之富以商而不知西國之富實以工藝商者運已成之貨工者造未成之貨粗者使精賤者使貴朽廢者使有用有工藝然後有貨物有貨物然後商賈有販運考工記曰百工之事皆聖人之所作中庸曰來百工則財用足夫以足財歸之於工此古聖人富國之要策重工之微旨也不惟此也商之盛由於財力必資本充而後盈餘厚故計銀錢以爲本息工之盛由於人力有一人之技藝則有一人之成器故計人以爲本息外國財多中國人多今日中國講富國之術若欲以商務敵歐美各國此我所不能者也若欲以工藝敵各國此我所必能者也勸工之道有三一曰設工學堂堂中設機器廠擇讀書通文理之文士教以物理學化學算學機器學繪圖學學成使爲工師擇聰敏少年之藝徒教以運用機器之方辨別物料之法各種緊要製造之程式鑄銅打鐵煉鋼解木柔革燒火製造水泥煉焦炭各門之實事學成使之爲匠目蓋外國工師皆是學人與匠目不同一深通其理而亦目驗其事一身習其事而亦漸悟其理學問實者工師亦可動手作工閱歷深者匠目亦能自出新意至學堂大小工藝門類多少則視其經費酌辦漸次擴充萬不可緩一曰設勸工場西國常有賽會之舉聚本國他國之貨物萃於其中人見己國貨精工巧則來購者多我見他

國貨精工巧價實銷多則力求進步此歐美賽會之本意也日本效之故設勸工場亦名貨物陳列所今  
宜於沿江沿海及內地各省大城巨鎮各設勸工場一區備列本省出產貨物工作器具縱人入觀外國  
人尤要一以察各國之好惡一以考工藝之優絀使工人自相勉勵此事並不甚難惟在 朝廷嚴飭各  
省切實舉行並將出產若干種人工製造若干種每年奏報若經過海關出口之土產名目增多工匠製  
造新器增多工廠增多書簿司關道有獎不辦者予以處分則無形之中收效多矣一曰以工獎以官職  
按考工記曰國有六職百工與居一焉故考工記之官皆專門工匠也擬懇 朝廷明定章程各學堂學  
成之工師及各局製造有效之匠目准由各省考驗確實分別保獎工師授以文職匠目授以武弁如有  
文士藝徒自備資斧至外國學堂工廠學習有成者驗其憑照按其等差分別保獎官職尤較在中國學  
習者更予從優三事並行中國工藝自然日進假如愚民小工一月得工錢三四千者學成後一月可得  
工資銀數十元土貨一年出口值二百兆者以後若能每年加增十分之一十年之後出口之貨即可加  
倍關稅之多自不待言至於自創新法造成各種貨物者給予牌照准其專利若干年凡人工所成之貨  
釐稅尤須從輕新出式樣並免釐稅三年亦爲鼓勵工藝之要務總之欲養窮民查荒地不如勸百工欲  
塞漏卮拒外人不如造土貨富民富國確實可憑如此則但患生齒之不繁耳豈患生齒之日繁乎一定

礦律路律商律交涉刑律中國礦產富饒蘊蓄而未開鐵路權利兼擅避疑而未辦二事久爲外人垂涎近數年來各國紛紛集股來華知我於此等事務尙無定章外國情形未能盡悉乘機覬我權利侵權或藉開礦而攬及鐵路或因鐵路而涉及開礦此國於此省倖得利益彼國卽於他省援照均需動輒號稱某國公司漫指數省地方爲其界限祇知像先覓指地段不知何年方能興辦近年法於雲貴德於山東英意於晉豫早有合同章程紛歧恐未必盡能妥善此次和議成後各國公司更必接踵而來各省利權將爲盡奪中國無從自振矣且此後內地各處礦務鐵路洋人無處不有不受地方官約束任意欺壓平民地方官只有保護彈壓之勞養兵緝捕之費無利益可沾無抵制之術一旦百姓不堪欺陵或滋事端又將株連多人賠償巨款爲害何可勝言此必須訪聘著名律師採取各國辦法秉公妥訂礦路畫一章程無論已經允開允修之礦路未經議開議修之礦路統行核定務使界址有限資本有據興辦有期國家應享權利有著地方彈壓保護有資華洋商人一律均沾洋人有範圍則稍知斂戢平民免欺侮則漸泯猜嫌至滋生事端公司受累亦須分別有因無因辦犯賠償亦須釐定限制庶中國自然之大利不至爲中國無窮之大害尤今日之急務也再互市以來大宗生意全係洋商華商不過坐賈零販推原其故蓋由中外製造機器製造均非一二人之財力所能所有洋行皆勢力雄厚集千百家而爲公司者歐美

商律最爲詳明其國家又多方護持是以商務日興中國素輕商賈不講商律於是市井之徒苟圖私利彼此相欺巧者虧逃拙者受累以故視集股爲畏途遂不能與洋商爭衡況凡遇商務訟案華欠洋商則領事任意要索洋欠華商則領事每多偏袒於是華商或附洋行股分略分餘利或僱無賴流氓爲護符假冒洋行若再不急加維持勢必至華商盡爲洋商之役而後已必中國定有商律則華商有恃無恐販運之大公司可成製造之大工廠可設假冒之洋行可杜華商情形較熟工價較輕費用較省十年以後華商即可自立駁駁乎並可與洋商相角矣且徵收印花稅其公司工廠行棧掛號等費皆係與商律相輔而行之事必有商律方能興辦故又不可不急行編定也至刑律中外迥異猝難改定然交涉之案華民西人所辦之事輕重不同審訊之法亦多偏重除重大教案新約已有專條無從更定此外尚有交涉雜案及教案尙未釐大事者亦宜酌定一交涉刑律令民心稍平後患稍減則亦不無小補擬請由總署電致各國駐使訪求各國著名律師每大國一名來華充當該衙門編纂律法教習博採各國礦務律鐵路律商務律刑律諸書爲中國編纂簡明礦律路律商律交涉刑律若干條分別綱目限一年內纂成由該衙門大臣斟酌妥籌請旨核定照會各國頒行天下一體遵守惟所有各國律師必須確係學識著名會辦大事之人不妨優給薪水庶各國聞名敬服知中國礦路商各律及交涉刑律係其訂定不致



爭執妥駁方爲有益此項教習其合同內須議定歸礦路商務大臣節制並隨時與該衙門提調商辦一面於該衙門內設立礦律路律商律交涉刑律等學堂選職官及進士舉貢充當學生纂律時幫同編譯繕寫集成後隨同各該教習再行講習律法學習審判一兩年四律既定各省凡有關係開礦山修鐵路以及公司工廠華洋錢債之事及其他交涉雜案悉按所定新律審斷兩造如有不服止可上控京城礦路商務衙門或在京審斷或卽派編纂律法教習前往該省會同關道審斷一經京署及律法教習覆審卽爲定讞再無翻異京城學生畢業并須隨同洋員學習審判此等案件學成後卽派往各口充審判官隨時添選學生接續學習以期多儲人才取用不竭各洋教習既爲我編纂四項新律兼能教授學生卽可長留在京以備諮訪而資教授果能及早定此四律非特興利之先實實爲防害之要著矣一用銀元銀元之利有三平色重一出納分明吏胥不能舞弊勒索官民不致貼補受累一也商賈交易簡捷無欺賒借無權既益於行旅亦便於匯兌二也官款收發全用銀元以大元爲母小元爲子相輔而行工火局用外尙有盈餘三也惟官署之款若係採辦官物製造工料等事商民物價工價必然賒加其中且出納皆以大元爲主小元不能過多然鑄數發數既多盈餘亦尙不少此爲整齊銀幣之善政尙不在有無盈餘也惟有最要兩端或謂中國用銀皆以兩計各國洋銀皆係七錢二分宜每元改爲一兩方爲整齊適

用此論未嘗無見特是錢幣之制權量之法必先有雄厚之力乃能操轉移之權中國財窘商弱不能自  
爲風氣以後尤甚者銀元輕重恰與洋銀相同尙可依傍洋銀而行設改爲一兩與洋銀數目參差恐沿  
江沿海洋行不肯行用商準不行內地必阻故仍須鑄七錢二分者方有暢行之益或又謂官收則按庫  
平庫色補足官發則以銀元當紋銀計算不必補水部庫歲可得鉅款此則萬萬不可出納必須一律商  
民方能流通蓋交官之款自必指定專收中國龍紋銀元然則收款所進之龍元仍是官局發出之原物  
必官先發一萬然後民間有交官之一萬是官款發出時已先將此一萬之盈餘扣收在庫矣果能收發  
一律則商民信用不疑散布天下或辦貨或積存周轉不已大率皆在民間豈能將每年發出之數全以  
繳納官款還之於庫乎若出納不一則民間亦以九成視之其勢斷斷不能通行且爲英國墨西哥日本  
諸國銀元所軋必致從而壓價每元尙不及九成之實數華商自行壓價何論洋商商準既須折算民間  
安肯收用彌滯虧折其損多矣尙何盈餘之有乎昔咸豐年間發行鈔票矣徒以計臣不知理財之大道  
不考宋人交子會子之用法不籌票本其意但欲出空紙以換實銀於是出納兩歧發款搭成多收款搭  
成少或收款全不准搭或發款全用鈔票戶部既不視爲實銀民間亦遂視爲虛器數年之後殫廢不行  
鈔票一百值銀二兩此乃前車之鑒萬不宜以此自阻銀元之銷路也一行印花稅查外國征商之政除

煙酒洋藥外大率皆無關稅其鉅款全在印花稅凡有關銀錢物業之契約單據領用官局印花黏貼其上其大意在抽銀不抽貨抽已賣之貨不抽未賣之貨抽四民百業凡有進項之人不僅抽商賈貿易之人故西人解印花稅之義曰此乃銀錢稅也今日籌款此事似可仿行且洋關現議加稅外人必欲免內地釐金若行印花稅尚可藉資抵補查各國印花稅章程光緒二十二年曾經總署飭各使向各國查取譯送惟英國印稅章程最為詳密且係參照馬格里所譯解說亦較明晰日本於前三年新經改定於東方情形為較近但中外情形略有不同外國商民僑產價值銀錢往來多故所抽鉅中國商民苦本業既微轉移亦少如契約合同股票匯票期票提單之類皆屬有限其遺產一項英國最為鉅款其重稅全在旁支承受親友分得每年總數收十四兆餘鎊而遺產一項多至八兆餘鎊中國產業本廉又係子孫相繼故此稅勢不能多然中國若能辦成即較英國得二十分之一亦可徵銀五六百萬但其查考領用之法分別差等之數甚為繁細查英法徵收印花稅初辦時亦多梗阻皆係第一次改革始克暢行中國初辦之時隱匿必多推敲過細不免紛擾只可稍為從寬不求算無遺策必須十年八年以後稽核之法漸周自然日臻暢旺矣應請 敕查各國章程斟酌妥議舉辦一推行郵政查外洋各國郵政為籌款一大端大率歲入皆銀數千萬兩而遞信最速中國驛站為耗財一大端歲費約三百萬兩而文

報最遲盈虧相反遲速亦相反然則此事必宜變通可知其故由於有驛州縣馬必缺額又復疲瘦州縣以此爲津貼管驛家丁以此爲利故文報必致遲延官紳書信間有外加馬封附文遞送者有驛官以其非例准之條又係不費之惠故既不駁回亦不收費浮沈聽之州縣不當驛路者設鋪司武官文報交匯汎其延擱更甚於驛站中國既無郵局於是英德美日本諸國在中國自設信局使我利權盡非萬國通例自光緒二十一年奉 旨飭催總稅務司赫德辦理光緒二十二年沿江沿海漸設郵局附於海關稅務司兼辦於是沿江沿海公文私信迅速勝前而信資極省因稅務司禁信局由輪船寄信而又應信局滋聞故內地信兩仍由信局轉遞轉交其章程每代信局寄信一包重一鎊者收費一角而信局一鎊重之包封其包內之信少者二三十封多者五六十封其收民間之費每信一封至少須制錢一百故稅司所設之郵局用費不敷尙多此蓋因壟斷而生調停因調停而致賠累今擬於各省州縣遍設郵政局卽令州縣管理由省城總局妥定章程刊發印花領用黏貼用過照數報銷卽以原有驛站鋪司各經費撥充局用內河內地分別設立快划快馬健夫馳遞明定章程准帶官民私信所有京外文武衙門文報書信統歸此局遞送其文報資成仍照驛站向章其信資務宜從省以廣招徠如有欲匯寄銀錢及匯票者亦准附帶但須照海關郵局章程每信一封至多准寄洋銀十元或銀七兩其原有信局聽其自然民

間帶信或託官局或託商局均聽其便官局若費省而迅速自然來者日多查核該縣官局每年用去印花之數卽知所收信資之數計該縣一年收費若干卽於次年發驛鋪經費時扣除若干行之既久信資日增驛費日減十年之後專取信資卽敷局用驛鋪各費可以全行省出惟外國識字人多故書信多中國識字人少故書信少此等創辦之事不能遽計贏餘但使驛鋪經費專取之於信資則每年可省用款三百萬矣至各州縣地勢不同或馬或船或夫或水陸互用統由該縣酌量不爲定制但以妥速爲主其局費統於驛鋪經費內自行酌劑支用其局卽設衙署內並無另需費用並須於境內大鎮酌設分局此局不須多人亦無多事但派一人駐於客棧卽可或附於店鋪代辦亦可但經營發印花收信函收信資而已並無多費未收信資之先絕不裁減驛費亦不再發一錢此事於國有益於民亦便於商局無傷於州縣亦毫無所損以後該州縣所收信資如已敷向來請領驛鋪經費之數其盈餘者解歸省局充公仍提三成作爲該州縣獎勵以爲創辦奮勉者勸統計各省繁盛城鎮約有二百餘處驛費既敷以後每年亦可得進款二三十萬此時沿江沿海地方其由輪船者暫歸稅司內河無論輪船民船及岸上陸行者統歸州縣暢行以後再行體察情形如能並江海輪船郵局亦歸之州縣勿庸稅務司兼管尤爲善策至與各國商明中國亦入郵政公會一節此時華洋人寄信不多尙可從緩惟各省郵局應名曰驛政局以

免與稅司之郵政局相混應由各督撫督飭臬司黃成州縣設局辦理省出之費業解藩司並不需洋員以杜干預內政之漸且免與有驛州縣遞送文報轉轅窒礙海關郵局未歸州縣之先郵政局與驛政局彼此互相代寄信件內地寄內地者祇貼驛局印花內地寄通商各口者加貼郵局印花一分通商各口寄內地者加貼驛局印花一分其驛局與郵局彼此往來交易一切細章隨後詳酌至鐵路通行之處所有鐵路常年受 國家保護維持應為 國家遞送書信微申報効之忱沿路各州縣應得專差附搭火車往來經管信件不取車費惟萬不可將公文信件交與鐵路公司經管致敢授權外國之弊總之此事若歸州縣兼辦則費不另籌局山州縣酌設進退裕如即無大益亦無所損即或無礙亦必無絀若另行委員設局則 廷寄奏報要件設有遲誤必多批謫故惟有資成州縣之無弊也一官收洋藥方今籌餉最急然而零星羅掘難得鉅款釐金將撤礙難再加鹽價展加亦難過重惟有加價於洋藥則不病民而增鉅餉查法國及西班牙運售火柴呂宋煙日本在臺灣收售洋藥土藥皆由公家收買分銷今擬仿照其法檢海關貿易冊光緒二十五年洋藥進口銷售者五萬九千一百六十一擔溯查以前五年大率五萬擔上下最多者六萬三千一百餘擔最少者四萬八千九百餘擔每擔一百斤以六萬餘擔計合九千六百萬兩現在時價每兩價銀五錢姑以大率作一萬萬兩計算共計價銀五千萬兩稅釐在內擬

以後由官設局在各關進口時全行收買然後轉發散商分銷各省照時價加二成發商轉運專售除稅  
應照撥撥海關外計每年可得盈餘一千萬兩官局先向洋商總收據聽華商領運發商以後運赴何  
路價值低昂銷數盈絀全不過問尤爲簡易但每兩五錢係華商轉售之價其中必有餘利然則買價尙  
可在五千萬兩之內惟香港及沿海一帶須設巡緝小兵輪數艘光緒十三年赫德開辦洋藥稅釐併徵  
時創設巡緝其船式船數地段經費及巡緝之法總署均有奏案可考上海官設總局各海關進口處所  
宜設分局計巡船及總分局委員司事人役經費約計需銀二百萬兩以內開辦之初須籌銀一千萬兩  
以爲資本卽向外國銀行恩借應用分爲十年歸還此乃有苦之還款利息必輕先與議定總數隨時陸  
續提用起意除去巡船局歲歲還借款本息實可得銀七百萬兩十年後借款還清即可歲贏銀八百萬  
兩洵爲鉅款先行試辦一年辦有成效一年後再加價一成則盈餘更鉅若華商運銷暢順以後售價仍  
可相時酌加卽加價五六成以至加倍亦於良民無損設或因加價滯銷候至半年尙無起色則酌量減  
價權之仍照向來售價自可銷出亦必無賠折之理向來洋藥到口未必立時全行銷去今由官全數收  
買亦於洋商有益可與該洋商議明每年共分幾批每批貨到立時付定銀二三成其餘付給三箇月期  
票三月以後自然華商分來領運卽以商資轉付洋商惟初行加價轉售之章華商必然觀望希圖減價

不及半年存貨已盡斷不能始終把持故必須覓籌半年資本方能堅持定價然洋商既可收期票只須籌三箇月之費卽已足敷周轉自去年土藥加稅三成以後土藥運銷之數並未減少然則洋藥加價二三成亦必無礙藥商未必始終抗拒至內地土藥業經加收稅釐三成則英商當亦無所藉口若各官局有未經照加者應查明切飭一律實加三成其巡船未造成之先可暫以南北洋兵輪充用經費亦可稍省此舉應先與英國商明訂立專約每年包銷大萬擔不准多運來華包收二年二年後體察情形再訂續約近十年銷數不旺至光緒二十五年而始多今每年有切實銷數英人當亦樂從惟華商出洋私運進口不可不防若非英國實力助我防察斷難盡行杜絕除巡船稽查外應與英國切實議定只有各口官收英商不准絲毫私售華商以杜影射如查出有華商私買私運重立罰約印度若不濫售則偷運之弊立窮在我防之則甚難在英人禁之則甚易此爲第一關鍵若英肯訂約實辦則此舉之有益巨勛確有把握矣擬請 欽派大臣一員駐滬辦理此事名爲總理藥務大臣此事任重欸鉅而其事甚簡只須操守廉正確實可信於外國情形不隔閡者卽可勝任其各口分局委員統聽該大臣選派考核隨時偶一分往巡察此舉在中法則無害於民生在西法則無礙於商務應請 朝廷飭議迅速施行一多譯東西各國書今日欲採取各國之法自宜多譯外國政術學術之書譯書約有三法一令各省訪求譯刻譯



多者准請獎然經費有限書不能多也一請 明諭各省舉貢生員如有能譯出外國有用之書者呈由京外大臣奏開從優獎以實官或獎以從優虛銜發交各省刊行如此則費省矣然外國要書流播入中國者無幾不能精也一請 敕令出使大臣訪求該國新出最精最要之書聘募該國通人爲正編譯官卽責令所帶隨員學生助之通洋文而文理深者充副編譯官文理優而洋文淺者充幫辦編譯官其全不通洋文而文理平常者不准充出洋隨員學生以杜濫竽充數之弊限三年之內每人譯書若干種每種若干字回華繳呈不得短缺短缺及過少者不准保舉如此則去時洋文雖淺歸時洋文必深於隨員學生之學業暗中多所成就而所譯皆切用之書矣然猶不能速也并擬請 敕令出使日本大臣多帶隨員學生准增其經費僱其員領廣蒐要籍分門編譯譯成隨時寄回刊布緣日本言政西學各書有自創自纂者有轉譯西國書者有就西國書重加刪訂酌改者與中國時令土宜國勢民風大率相近且東文東語通曉較易文理優長者欲學編譯東書半年卽成鑿鑿有據如此則既精而且速矣以上各條皆舉其切要而又不可不急行者布告天下則不至於駭俗施之實政則不至於病民至若庸有爲之邪說謬論但以傳康教爲宗旨亂綱紀爲詭謀其實於西政西學之精要全未通曉茲所擬各條皆與之判然不同且大率皆三十年來已經奉 旨陸續舉辦者此不過推廣力行冀紓急難而大指尤在考西人富

強之本源釋西人立法之深意伏望 聖明深察遠覽早賜施行使各國見中華有發憤爲雄之志則鄙  
我侮我之念漸消使天下士民知 朝廷有改絃更張之心則頑固者化其謬望治者效其忠而犯上作  
亂之邪說可以不作天下幸甚又奏 臣等此次所奏變通政治諸條或養人才或厚民生或整軍實或肅  
官方所需經費必皆不少此次賠款極鉅籌措艱難論者必以度支困絀爲詞謂諸事方求節省豈宜更  
增用費遂不免顧惜遲疑 臣等之愚竊以爲不可今若竭海內之力百計搜括但供每年賠款以冀無事  
則外國必將視我中國皆苟安無志之人士無奮心民無固志各國之輕我侮我更將得步進步不待賠  
款還清而中國已不能立國矣竊謂節用之與自強兩義自當並行不宜偏廢此時應省之事必須省應  
辦之事必須辦應用之財必須用嘗聞數十年來論理財者大率皆以省爲先謂以備有事時用之此  
省事息民之常經開闢自守之警策而非所論於強鄰環伺之時勢也大率富強之道無論民事兵事皆  
須平日未雨綢繆多年積累近者四五年遠者一二十年卽如講求農工商本爲富國起見然當其創  
法開新埠之初必先官設學堂以爲教官創機廠以爲式官助資本以爲扶持然後農工商之利可開本  
欲阜財先必費財西洋各國皆然而日本爲尤著若立學教士練兵製械訓農勸工等事皆以款絀不辦  
一旦有急安得人才兵械而用之縱使存款頗多取辦倉卒止能募烏合之勇購廢雜之鎗虛糜而兼誤

事卽爲度支計亦甚可惜矣譬如備荒必須積穀於累年防水必須築堤於平日如待災成而後贖穀則飢民已轉於溝壑待水至而後修堤則田廬已淪於巨浸雖有多金重寶亦無所施至於軍國大計尤貴遠謀難規近利豫籌於平日則一錢得萬錢之益起辦於臨時則萬金無一金之效試以遼事證之道光辛丑廣東議和藩運兩庫現銀六百萬搬運塞途盡付賠款以近事證之上年天津不守司道局各庫存銀六百餘萬招商局存米四十萬石盡資外人然則務省儲而不務修備前車其在可爲寒心或又謂此時民力已困欲籌辦事之款豈不重爲民累此又不然譬如備荒必於本鄉捐社穀防水必於近村捐堤費社倉多一石則全活不止一命堤土高一尺則護田不止一畝雖甚竭蹶猶必爲之其初雖難其後必感推類言之寒士力學不可惜膏火中人之產不可無牆垣行江海者不可乘微舟負債多者不可廢酬酢夫豈不知籌措之艱難哉誠有所不得已也竊謂既須籌賠償之款尤宜籌辦事自強之款賠償之款所以紓目前之禍難自強之款所以救他日之淪胥應請 敕下政務處大臣戶部及各省督撫於賠款外務必專籌鉅款以備舉行諸要政庶幾各國刮目相待而中國之生機不至於遽絕矣至是 上諭奉 慈禧端佑康頤昭豫莊誠壽恭欽獻崇熙皇太后懿旨自經播越一載於茲幸賴 社稷之靈邇京有日臥薪嘗膽無時可忘推積弱所由來恨振興之不早近者特設政務處集思廣益博採羣言逐漸施行

擇西法之善者不難會己從人除中法之弊者統歸實事求是數月以來興革各事業已降旨飭行惟其中或條目繁重須待考求或事屬創舉須再多酌回鑒以後尤宜分別緩急銳意圖成茲據政務處大臣榮祿等面奏變法一事關係甚重請重申誥誡示天下以朝廷立意堅定志在必行並飭政務處以時督催務使中外同心合力期於必成用是特頒諭旨嚴加責成爾中外臣工須知國勢至此斷非苟且補苴所能挽回厄運惟有變法自強爲國家安危之命脈卽中國民生之轉機予與皇帝爲 宗廟計爲臣民計捨此更無他策爾諸臣受恩深重務當將應行變通興革諸事力任其難破除積習以期補救時艱昨據劉坤一張之洞會奏整頓中法以行西法各條其中可行者卽著按照所陳隨時設法擇要舉辦各省疆吏亦應一律通籌切實舉行大要不外言歸於實用得其人予與皇帝宵旰焦勞母子一心力圖興復大小臣工其各實力奉行以稱予意將此通諭知之○丁巳辰刻 上奉 慈禧端佑康頤昭豫莊誠壽恭欽獻崇熙皇太后自西安啟鑾至東關八仙庵拈香申刻至臨潼縣駐蹕○己未諭升允奏首站要差辦理不善請將該地方官懲處一摺據稱本月二十四日臨潼首站於應備供應全未辦理次日新豐中伙及驛口住站俱極草率侍從官員甚或枵腹該縣輒稱連日有留稱王公僕從結黨攫食藉口並不設法實屬疲玩無能請將該署臨潼縣知縣與良材卽行革職並自請議處等語此次回鑾迭經諭令沿途

地方官於一切供應務從儉約並先期行知定數內監人等及應從各官亦均三令五申不准稍有擾累情事朝廷體恤地方之意已無微不至乃該署縣夏良材於應備供應漫不經心藉口搪塞多未備辦所有隨扈官員人等不免枵腹竟日殊屬不成事體以誤差情節而論予以革職實屬咎有應得朕仰承慈訓曲予優容著加恩改爲交部議處升允自請議處著從寬免該撫仍當督飭經過各地方懷遵前旨妥爲備辦如有冒名攫食之人卽令派出各營立時查拿嚴行究辦○庚申 上奉 慈禧端佑康頤昭豫莊誠壽恭欽獻崇熙皇太后至華州駐蹕○以特圖慎爲盛京禮部侍郎○辛酉 上奉 慈禧端佑康頤昭豫莊誠壽恭欽獻崇熙皇太后至華陰縣駐蹕○諭軍機大臣等奕劻奏請准迎鑾一摺覽奏具見惻忱著卽前來河南迎鑾其總理外務部事務著李鴻章暫行署理步軍統領敬信未到任以前著崑岡暫行署理督辦善後一切事宜○壬戌 上駐蹕華陰詣玉泉院拈香○以永定河三汛搶護平穩出力人員寶廷等獎敘有差○是月俄羅斯國使臣格爾思回國雷薩爾繼之○義大利國使臣薩爾瓦得回國麥特羅瑪納署理

臣朱樹朋敬編

臣章士璩恭校

九月癸亥朔 上奉 慈禧端佑康頤昭豫莊誠壽恭欽獻崇熙皇太后至華欸廟拈香未刻至潼關廳

駐蹕○諭前因有冒充王公僕從於各州縣供給恃強擾食毀物曾經降旨嚴治現在將入豫境仍著松  
詩認真查明如遇有此等摺奪供給食物者即行嚴拿懲辦勿稍瞻徇○諭自西安啟蹕以來一路車騎  
殊形擁擠甚至乘輿已到尚復填塞道途殊不足以昭嚴肅著御前大臣督飭侍衛認真彈壓前驅清道  
勿許如前填塞並著松懋宣毓秀周萬貴各派兵勇分起押送車輛不准壅滯至隨扈之王公百官車輛  
尚多一入豫境道更窄隘除派有緊要差使者准帶隨身行李外其餘均著分起先行以免擁擠○乙丑  
賞給醇親王功德林及朔陽安定西直各門喇嘛資壽堂煖廠米石○賞給外城崇善堂等廠米石○丁  
卯 上奉 慈禧端佑康頤昭豫莊誠壽恭欽獻崇熙皇太后至河南園第鎮駐蹕○諭升允奏喀爾喀  
親王奴僕毆辱職官據實糾參一摺據解本月初四日據潼關關同知坦乃善面稟該驛委員候補巡檢  
李贊之經派委照料親王那彥圖行轅因隨從人等攔取鋪店什物該委員向前理阻致被捆縛毆辱等

語前迭經降旨諭令隨扈王公百官將隨從人等隨時嚴加管束不准滋擾乃那彥圖所帶親隨竟有毆辱職官情事該親王未能約束著交理藩院照例議處並將滋事之人卽行交出著升允嚴訊懲辦以肅法紀○戊辰 上奉 慈禧端佑康頤昭豫莊誠壽恭欽獻崇熙皇太后至閩縣縣駐蹕○以鐵良爲內閣學士○己巳 上奉 慈禧端佑康頤昭豫莊誠壽恭欽獻崇熙皇太后至靈寶縣駐蹕○奕劻等奏京師自遭兵燹各倉爲洋人佔踞經 臣奕劻屢向催索始得陸續交還當以倉庾積儲無存俸甲米石停放已久本屆江浙漕糧應改由火車運京以維根本業將籌議辦法於六月間會同 臣鴻章及部 臣倉臣奏 聞在案先是於五月二十一日承准軍機大臣字寄五月初三日奉 上諭那桐奏南漕運京酌擬變通辦法一摺漕糧積弊甚深值此時艱亟應改絃更張妥籌良法該侍郎所請將江浙漕米徑運京倉酌擬辦法各條尙屬可行著戶部倉場侍郎直隸總督分別詳察情形妥定章程奏明辦理其應修鐵路之處並著奕劻李鴻章酌核勘辦等因欽此 臣等伏查漕糧積弊關於運務者半關於倉務者亦半運務之弊莫甚於剿船盜米攪水今日因時制宜不得不改由火車轉運已於前摺具詳惟既籌改運之方以善其始尤貴定收放之法以持其終則倉務之弊有亟須切實整頓者 臣等悉心商酌正擬將續議辦法會同具奏復欽奉七月初二日 諭旨各省漕糧全行改折以採買運解收放儲備分飭漕 臣倉 臣妥

議辦理仰見 聖主軫念民艱慎重倉儲之至意現在整頓倉務自以專責成防弊竇為第一要義謹將倉廩酌量歸併糾變照舊備用以及增添各倉經費嚴杜領米弊端擬議切實辦法四條另繕清單恭呈 御覽至 榮慶 恩溥應遵 旨依限覆奏者此摺所陳已具大略除其餘未盡事宜應俟京津鐵路收回再將朝陽門外太平倉如何接修枝路之處由 臣奕劻 鴻章酌核勘辦並俟漕 臣議定採買運解章程其如何交倉兌收之處另由 倉 臣具奏總期去歲口之弊不失當年立法之精收改革之益預杜後來續出之弊統由部 倉 臣隨時酌核外所有 臣等會議整頓京倉緣由謹合詞恭摺具陳得 旨如所議行 整頓京倉辦法清單 一倉廩應酌量歸併也查城內七倉祿米南新宮新興平北新海運等六倉均於交還後經 倉 臣親往履勘計各倉現存可用之廩祿米倉三十六廩富新倉三十三廩興平倉三十二廩南新倉十二廩惟厥門地板損失甚多廩頂牆垣及官廩倉門等處間有拆毀均應及時修理已由 倉 臣飭令各該倉監督仿照民間作法核實估修計四倉一百十餘廩共需實銀三千餘兩即在倉場輕贖項下開支南新倉尚有二十廩毀壞情形稍重約需修費三四千兩如果廩座不敷周轉容再飭令修復舊太倉現甫交還拆毀無多修理尤易以上五倉均擬照侍郎那桐原議留為現時儲米之用其北新海運兩倉被毀情形較重經 倉 臣詳加勘視北新倉尚有二十餘廩堪以修理海運倉木植磚瓦尙多



臣等查倉場衙署兩所通州一所已毀且運務改革無庸再修崇文門外一所距倉太遠若改海運倉爲倉場衙署擬爲修葺便可就近辦公以上兩倉擬暫不裁撤亦不興修每倉留監督一員作爲簡缺暫爲駐守俟日後體察情形奏明辦理至朝陽門外太平倉侍郎那桐原議留作南漕卸車米棧應俟勘辦鐵路時再行酌定暫由倉上移會綠營撥兵妥爲看守又本裕豐益兩倉專儲外三營兵丁食米惟每年放米約八萬石分儲兩倉不無糜費擬酌留地勢適中之豐益一倉俾外三營兵丁統由該倉關支以示體恤其本裕倉及朝陽門外儲濟倉通州中西兩倉應請一併裁撤一斛隻宜照舊備用也查漕糧經倉向懸斗斛不計斤重本年江浙漕糧改由火車運京經前任通永道沈能虎與鐵路總辦英兵官簽訂合同內載米糧裝用麻袋每包計重一百四十斤蓋以火車裝運接噸計算每噸重一千六百八十斤即合漕米十二石每石應得一百四十斤中等前摺聲敘兌收辦法無論漕白正耗概米統以一百四十斤爲一石原係按照合同而言火車運卸既用磅秤交倉時逐袋過磅以亦較爲便捷乃自開兌以來經倉臣詳加體察逐日運到米袋大小不一輕重懸殊搬運進倉人夫衆多爲時愆促過磅之數率皆約略登記是以祿米倉驗收蘇省陳漕除由委員按磅登記外仍於入版時督令倉役另行過斛以憑稽核旋於富新倉驗收蘇省新漕卽令查照舊章仍用斛收且按米石斤重計之新糧與陳糧不同白糧與漕糧又不

同日預兌收倘可分別核計迨日後開放之時各旗於用磅之法驟難通曉必致議論各殊動多爭執擬令嗣後各倉收放仍以過斛為憑所備斛隻一律較準出入不得參差惟火車裝運既按噸數計算所有開支運費自應不論米色統以一百四十斤為一石以符原議一各倉經費應量為增添也查倉中弊弊不專在花戶而在從容把持之人俗名謂之身後身後之敗於把持者其資財甚富其聲氣甚廣歷來倉中所用之人皆賴身後倉中辦之事情由身後墊資馴至太阿倒持勢成積重其弊亦遂不可究詰前倉中未嘗不思整頓徒以倉中辦公竭蹶不能盡去身後即不能盡絕弊端雖經查出虧空嚴定章程而肉補瘡終非全策現當整飭庶務之際未便再事因仍徒滋掣轡至身後人等稔惡多年人所共曉迹其竄耗倉儲盈千累萬實已罪無可逭此後如有故態復萌干預倉務者即由倉中徑行查拿照光棍例懲辦以儆效尤惟欲清其源繼以籌給各倉經費為最要關鍵如監督養廉一項向例每月歲給銀三百兩現在常用駐倉責成尤重除北新海運兩倉餉缺監督二員毋庸添給外其餘米等倉監督擬請增添一倍每月歲給銀六百兩至倉役工食暫按米數酌給各倉收米時每石給入販費銀二分放米時每石給過斛裝袋費銀二分平日挑原看守每年每米一石給公費銀一分核計運米百萬石約需銀五萬兩統由倉中於輕贍項下核實開支至官兵承領俸餉米石向有應給筒票錢為花戶人等

飯食之用現既增添各倉公費嗣後無論關領俸米甲米所有簡票錢一項毋庸重支其運糧各省應交  
簡兒錢改爲倉費名目照舊起解以期核實 一領米弊端應嚴行杜絕也查旗下領米向有成事散事  
名目每值開放甲米時由糧店匪徒名曰外煽者爲之關說任其定價由各旗易錢散給兵丁左翼尙多  
領米名曰散事右翼各旗大率成事卽有公廉都統不染外煽一錢亦不過米價稍增每兵多得數緡而  
止其應領之米均由身後外煽串通糧店擇倉中上好之米開放查倉御史暨監督各員妄分者畏其地  
烟囂忍不問不肖者或竟與之聯絡冀圖分潤今當整頓之始務期力挽頹風倘再有外煽人等託名花  
費勾結舞弊一經各旗都統及部臣倉庫訪問或經食米兵丁告發均卽拿送刑部按照定例從重治罪  
至此後存倉米石爲數無多每歲採運不過僅敷支放儲米之法擬就現留各倉輪流派進新糧恪守以  
放代盤之成規永杜挪新補陳之流弊並使各旗各倉均不得以陳米藉口每季放米時滿漢官員應領  
俸米擬於例定統限之內各分品級滿員按旗漢員按署分別先後酌定開放日期於票內註明令其屆  
時或由本員或交家人持票赴倉挨次支領既免擁擠兼杜稽延其各旗應領甲米仍按例定月分先後  
由倉庫酌定日期隨時知照各旗營都統大臣轉飭參佐領等按期赴倉關領不得以有別項差事及車  
輛不齊改期再領等語藉口推諉以免積壓而重兵糈再倉儲出納每倉向有御史一員專任稽查按年

更換原以從前京通十餘倉坐落既非一處而各倉糯米存積尤多每屆兌收南漕倉臣於春夏兩季必須移駐通州其於各倉收放事宜督察勢難遍及所以各倉均有稽查御史一員責任亦云重矣然歷來倉弊之深虧空之鉅罕有經查倉御史摘發者蓋因御史與監督向無統屬呼應不靈臣等查舊例在京各倉或都統或副都統各派一員專任稽查與御史同至乾隆五十九年始將都統副都統查倉之例停止道光年間銀庫虧案發覺將查庫御史裁撤各在案現在整頓京倉事事求其核實倉廩既經歸併漕運亦已改章米數無多稽查較易隨時由倉臣就近責令監督各員遇事盡心自可消除積習如有花戶人等仍前舞弊則監督責無旁貸一經部臣倉臣與科道各員訪問確實人人可以奏參較之以稽查之任專責之查倉御史一人查吏為有益臣等於本年業經奏請將簡派抽查漕糧御史二員撤回茲復將各處倉廩酌量歸併所有擬定裁撤之通州中西兩倉城外儲濟本裕兩倉又擬暫不裁撤之城內北新海運兩倉及留為南漕米棧之城外太平一倉目前既不儲米自應請旨將各倉稽查御史撤回至現擬留用之漕米南新宮新興平舊太豐益等六倉臣等體察情形亦無須專派御史惟事關史改舊例可否將祿米等倉稽查御史一併撤回並准此後停止簡派之處臣等未敢擅便得旨著照所請該部知道○奏劄等奏京師為根本重地漕糧為俸糈所關臣奏劄於光緒二十四年八月會同尚書孫家

部并戶部於遵議折漕摺內會將都市米價易於居奇每歲南糧宜寬儲備緣由縷晰陳明在案本年七月初二日恭奉 諭旨河運海運一律改徵折色仍以倉儲關係緊要 飭令按年籌備是京倉未可久虛兵民亟於待哺已在 聖明洞鑒之中惟本年等籌議起運漕糧百萬徑運京倉實係核定應放數目爲倉中必不可少之數開運以來南省疊請減折兼以存漕一年徵變折耗約計米數自今秋至明年二月尙敷支用三月以後卽無米可放現既 諭令漕運總督詳定辦法採辦運解擬請 飭下該漕臣會商兩江督臣江蘇浙江撫臣於應辦白糧外每年務須採辦漕糧一百萬石並除去折耗亦不得率請截留早日運解以實 天庾至江安及浙江起運和米旗嫩體脆兵丁素不願食每年開放動致挑剔現在改章採辦與從前就地徵兌情事不同擬請 飭下漕臣嗣後運解之米全行採辦粳米以昭畫一而重兵糈下戶部知之○奏勅李鴻章電致 行在軍機處頃據英使兩稱本年四月二十日曾探詢日後將鐵路歸還中國擬派何員督辦兩致在案茲雖該鐵路歸還尙非其時然 回鑾在即亦用白蘆溝橋至馬家堡鐵路如派鐵路督辦大臣將 開路之事商妥尙有鐵路他事尙可會同相助將來交還鐵路時有通達鐵路事宜之大員接收經理尤爲殷盼擬請從速奏保督辦一員與本國武官將 開路一切工程及關係鐵路他事一併妥商是爲切要等語查津榆鐵路自許量澄故後久無督辦今和議已定

鐵路必須收回茲英使以商辦 回鑾鐵路工程與關繫鐵路他事請奏保大員督辦正可乘機利導然  
所派之員如與英人不洽恐於交收鐵路有礙候補侍郎胡燏棻素能與英人聯絡且自山海關外至新  
民廳鐵路俄人現議交還該路本係胡燏棻借英款興造尚未竣工如蒙 簡派該侍郎為關內外鐵路  
督辦大臣必能一氣聯絡於收回鐵路事宜實有裨益不僅鐵路工程得以妥速已也請代奏 上諭軍  
機大臣等奏勅李鴻章等電悉現在公約已定津浦鐵路自應即行交還茲據樞英使來函所云尚非其  
時不知將何所待定於何時交還該使又云鐵路工程外尚有關繫鐵路他事亦可並商所謂他事者係  
屬何事著奕劻李鴻章確詢情形詳晰電覆並即切實商定將鐵路趕緊收回至所請簡派大員督辦一  
節胡燏棻現正籌辦善後一切事宜分派兼顧著派外務部侍郎徐壽朋仍與張翼會同辦理即將收回  
鐵路事宜飭令悉心商議妥為籌畫○庚午以河運時為湖南布政使明徵為浙江按察使○辛未 上  
奉 慈禧端佑康頤昭豫莊誠壽恭欽獻崇熙皇太后至陝州城駐蹕○壬申 上奉 慈禧端佑康頤  
昭豫莊誠壽恭欽獻崇熙皇太后至張茅鎮駐蹕○調張有忠為甘肅西甯鎮總兵劉萬勝為江西九江  
鎮總兵○癸酉 上奉 慈禧端佑康頤昭豫莊誠壽恭欽獻崇熙皇太后至觀音堂駐蹕○甲戌 上  
奉 慈禧端佑康頤昭豫莊誠壽恭欽獻崇熙皇太后至瀾池縣駐蹕○調柯逢時為江西布政使張紹

華爲湖南布政使○乙亥 上奉 慈禧端佑康頤昭豫莊誠壽恭欽獻崇熙皇太后至龍門鎮駐蹕○

丁丑 上奉 慈禧端佑康頤昭豫莊誠壽恭欽獻崇熙皇太后至新安縣駐蹕○戊寅 上奉 慈禧

端佑康頤昭豫莊誠壽恭欽獻崇熙皇太后至河南府洛陽縣駐蹕○諭軍機大臣等盛宣懷電奏請調

津海關道黃建楚襄辦通商條約等語黃建楚准其調往著李鴻章飭令該員卽行赴滬隨同辦理○辛

巳 上奉 慈禧端佑康頤昭豫莊誠壽恭欽獻崇熙皇太后至關林龍門香山等寺拈香○壬午諭開

缺廣西巡撫于蔭霖奏保薦人才道旨自陳一摺貴州按察使曹鴻勳湖北候補道沈錫周襄陽府知府

鄧嘉綏河南河南府知府文悌安徽鳳陽府知府馮煦前安徽宿松縣知縣孫葆田均著交軍機處存記

戶部郎中陳宗燾湖北試用知縣松桂宜都縣知縣李天桂河南安陽縣知縣石庚湖北襄陽縣知縣李

祖蔭奉天錦縣知縣補用同知增韞安徽廬貢生程朝儀均著送部引見○諭大學士王文韶外務部尙

書劉鴻藻著督辦關內外京榆鐵路一切事宜仍著張蔭桓會同辦理○癸未諭朕欽奉 慈禧端佑康頤

昭豫莊誠壽恭欽獻崇熙皇太后懿旨據慶親王奕劻電稱李鴻章十九夜忽病吐血次晨微好等語覽

奏深爲廕念該大學士爲國勞瘁務須加意調攝早日痊愈現在病情如何眠食能否如常卽行電奏以

紓系○劉坤一奏時局艱危財賦日絀等語奉 諭旨查聖荒地卽飭藩司隨時查訪濱江濱海久荒

可墾之地上年查得通州分公司所屬呂四場坐落通州境東北皆海其東南一帶有名東彌塗二補三補及海門廳東小安沙地方各蕩灘共計一千數百頃呂四本係鹽場鹽法舊有放荒蓄草禁民開墾之例故荒廢之蕩幾占及該場全境之半海門小安場沙灘本係蘇松狼山兩鎮及民間於道光咸豐年間報買之地嗣因原報案之戶無力繳價築堤故亦聽其荒廢已閱六七十年臣思此項蕩灘廢棄可惜若聽民間以肥瘠爲棄取則所墾復有幾何而全局通籌需本甚巨非得本地公正明白見信於人之紳士爲之斟酌辦法集款倡導則民隱未必盡知即巨款亦無從籌措查有通州在籍翰林院修撰張寒經前署督臣張之洞奏派經理通海商務著有成效即商令鳩集公司酌度情形築堤開墾據張寒經詳查擬具集股試辦墾牧章程由臣核定復經臣札飭江甯藩司兩淮鹽運司委員會同地方鹽務印官逐細測量按照供煎額鹽草地外寬留兩倍有餘此外責成公司陸續開墾由印委各員繪圖貼說詳由藩司運司核詳定案其海門小安沙凡屬蘇松狼山兩鎮舊時報買之灘除前已圍築外未築之地均經飭據呈覆無力願聽公司築堤日後按兩鎮倘餘繳價銀數收地民間原報而迄未繳價者十四案歷屆大丈催繳罔應並由印委各員查明詳由藩司註銷歸入公司責成開墾一俟股分集有成數即可次第開辦俾荒廢之區得以墾熟升科於國計民生均有裨益得旨知道了即著認真開辦務收實效○乙酉諭



都察院事務院簡左都御史呂海寰署理外務部左侍郎呂海寰未到任以前著那桐署理○外務部  
侍郎徐壽朋卒賜卹如例○丙戌 上奉 慈禧端佑康頤昭豫莊誠壽恭欽獻崇熙皇太后至偃師縣  
駐蹕○丁亥 上奉 慈禧端佑康頤昭豫莊誠壽恭欽獻崇熙皇太后至常縣駐蹕○戊子 上奉  
慈禧端佑康頤昭豫莊誠壽恭欽獻崇熙皇太后至汜水縣駐蹕○諭朕欽奉 慈禧端佑康頤昭豫莊  
誠壽恭欽獻崇熙皇太后懿旨李鴻章病尚未愈朝廷實深懸系該大學士爲國宣勞愛勤致疾著假  
十日安心調理以期早日就痊俟大局全定榮膺懋賞有厚望焉○己丑 上奉 慈禧端佑康頤昭豫  
莊誠壽恭欽獻崇熙皇太后至榮陽縣駐蹕○命王文韶署理全權大臣○以袁世凱署理直隸總督未  
到任以前命周馥暫行護理○調張人駿爲山東巡撫○諭朕欽奉 慈禧端佑康頤昭豫莊誠壽恭欽  
獻崇熙皇太后懿旨大學士一等肅毅伯直隸總督李鴻章器識湛深才猷宏遠山翰林倡率淮軍戡平  
髮捻諸匪厥功甚偉朝廷特沛殊恩封伯爵錫賚綸扉復命總督直隸兼充北洋大臣匡濟艱難和  
中外老成謀國具有深衷去年京師之變特派該大學士爲全權大臣與各國使臣妥立和約悉合機宜  
方冀大局全安榮膺懋賞遽聞遘疾悼良深李鴻章著先行加恩照大學士例賜卹賞給陀羅經被派  
恭親王溥偉帶領侍衛十員前往奠醑予諡文忠追贈太傅晉封一等侯傳入祀賢良祠以示篤念舊臣

至意其餘飾終之典再行降旨○庚寅 上奉 慈禧端佑康頤昭豫莊誠壽恭欽獻崇熙皇太后至鄒州駐蹕○以恩壽爲漕運總督吳重熹爲江甯布政使楊文鼎爲福建按察使○辛卯諭昨據世鐸等奏參升允殿學侍衛一摺當經諭令升允據實覆奏茲據奏稱該撫於二十六日迎駕後乘馬先行忽有大車並軌奔馳幾被衝倒查坐車人係屬旗員詰問姓名堅不肯說經照例鞭責等語侍衛海鴻既在駕前導引卽不應乘車奔馳又不聲明官職咎有應得那彥圖並未查明實情率行具奏跡近報復一經派員查訊不難水落石出惟事屬瑣屑姑免深究該撫尙未查明卽行鞭責亦有不合升允著交部察議此後如有官弁太監人等恃強滋事仍著升允隨時據實參辦以肅法紀不得因此案稍涉瞻徇○是月德意志國新簡駐華使臣穆默抵任尋出京參贊商務士署理

冬十月癸巳朔日有食之○上奉 慈禧端佑康頤昭豫莊誠壽恭欽獻崇熙皇太后至中牟縣駐蹕○政務處禮部奏本年七月奉 上諭科舉爲掄才大典我朝沿用前明舊制以八股取士名臣碩儒多出其中其時學者皆潛心經史文藝特其緒餘乃行之二百餘年流弊日深士子但視爲弋取科名之具剿襲磨濫於經史大義無所申明急宜講求實學挽回積習況近來各國通商習巧日闢尤貴博通中外儲爲有用之材所以各項考試不得不因時變通以資造就著自明年爲始嗣後鄉會試頭場試中國政治

史事論五篇二場試各國政治藝學策五道三場試四書義二篇五經論一篇考官閱卷合校三場以定去取不得偏重一場生員歲科考仍先試經古一場專試中國政治史事及各國政治藝學策論正場試四書義五經義各一篇考試試差庶吉士散館均用論一篇策一道進士朝考論疏殿試策問均以中國政治史事及各國政治藝學命題以上一切考試凡四書五經義均不准用八股文程式策論均應切實敷陳不得仍前剽竊自此次降旨之後皆當爭自濯磨務以四書五經爲根柢究心經濟力戒浮囂明體達用足備器使庶副朝廷求治作人之至意所有各試場詳細章程及其餘各項未盡事宜著禮部會同政務處妥議具奏欽此欽遵仰見 聖謨深遠洞澈源流於祛除積弊中甄拔真才於講求時務中昌明正學士林興起薄海同欽 等伏考 本朝定章試士原有論策近因鄉會歲科各考偏重時文士學日非遂爲通人所訾議至經義始於北宋體裁一如講義文筆亦尙雅馴溯查順治二年制科取士亦曾試以四書五經義厥後屢有變更今既一律考試論策義是 聖今仍以酌古天下學術所在即國家治本所賅關係實非淺鮮惟科舉節目煩緒紛繁考核務極其周詳通變不離乎宗旨 等語稽例案參酌時宜謹將各項考試事宜詳擬章程開列清單恭請 欽定伏候 命下分別咨行京外各衙門一體遵照其餘內外鑲一切場規悉照科場條例辦理如尙有未盡事宜應行變通之處卽由各督撫學政隨時酌度

咨由禮部另行核議具奏得 旨允行○甲午 上奉 慈禧端佑康頤昭豫莊誠壽恭欽獻崇熙皇太后至開封府駐蹕○諭袁世凱奏山東惠民縣境五楊家漫口堵築合龍請將出力各員獎勵一摺此次五楊家大隄漫溢成口情形甚重經袁世凱督飭各員趕緊堵築於九月二十四日合龍二十六日一律斷流工程悉臻穩固辦理尙爲妥速所有在工出力之降二級調用按察使尙其亨革職道員周祝革職候補直隸州知州任嘉斌原參處分四等一併開復分省補用知府李繼綱等均著照所請獎勵以示鼓勵餘著照所議辦理另片奏已革山東候補知縣涂紹光留辦河工始終勤奮請開復原官等語涂紹光著准其開復原官仍留原省補用該部知道○諭朕欽奉 慈禧端佑康頤昭豫莊誠壽恭欽獻崇熙皇太后懿旨周馥奏督臣因病出缺代遞遺疏一摺大學士直隸總督李鴻章以儒臣起家軍旅早膺疆寄督辦綸扉輔佐中興削平大難嗣在北洋三十餘年辦理交涉悉協機宜上年京師之變事機萬緊該大學士忠誠堅忍力任其難 宗 社復安朝野攸賴本年七月間因病迭經降旨慰問該大學士仍力疾從公未克休息忠靖之忱老而彌篤方冀調理漸痊長資倚任乃驟患咯血遽致不起當茲時局艱難失此柱石重臣曷勝愴惻前已加恩賞卹予諡文忠追贈太傅晉封一等侯爵入祀賢良祠著再賞銀五千兩治喪由戶部給發原籍及立功省分著建立專祠並將生平戰功政績宣付國史館立傳並撥回籍時

沿途地方官妥爲照料任內一切處分悉予開復應得卹典該衙門察例具奏伊子刑部員外郎李經述  
著賞給四品京堂承襲一等侯爵毋庸帶領引見工部員外郎李經邁著以四五品京堂用記名道  
方著俟服闋後以道員遇缺簡放伊孫戶部員外郎李國杰著以郎中卽補李國燕李國煦均著以員外  
郎分部行走李國熊李國璣均著賞給舉人准其一體會試用示篤念源臣有加無已之至意○乙未命  
載洵在御前行走載瀾載瀚在乾清門行走○刑部尚書薛允升卒予祭葬賞其子薛承謨員外郎薛家  
熙主事○丙申諭本日已革布政使王廉呈遞安摺殊屬冒昧嗣後革職人員均不准呈遞摺件以肅體  
制○調張百熙爲刑部尚書以爲寶華爲工部尚書○調陳邦瑞爲戶部右侍郎梁仲衡爲工部右侍郎  
以沈家本爲刑部右侍郎○命張德彝充出使英國兼義國比國欽差大臣○以貽穀爲鑲黃旗蒙古副  
都統○固山貝子毓寬卒予祭葬追贈貝勒銜○丁酉飭徐琪毋庸在 南書房行走○戊戌調孫金彪  
爲湖南永州鎮總兵○壬寅諭禮部具奏 慈禧端佑康頤昭豫莊誠壽恭欽獻崇熙皇太后萬壽禮節  
一摺上年 萬壽聖節欽奉 慈禧一切典禮仍著概行停止現在行抵開封 聖母皇太后降懷 宗  
社依戀彌殷 諭令一切典禮仍著概行停止朕於是日率同王公百官在便殿行禮該部卽遵諭行  
○甲辰諭軍機大臣等劉坤一電奏徐州拿獲會匪供稱匪首張步松在鹿邑一帶倡亂逼近開封等語

著松壽速飭嚴密查拿該匪首等務獲懲辦○丙午以直隸永定河防堵出力予大順廣道龐鴻書等升敘有差○丁未諭政務處奏請飭各省巡辦學堂等語建學儲才實爲當今急務前經諭令各直省著設立學堂責成該督撫學政切實通籌舉辦通省學堂同時並舉財力或有不逮若必待各府縣州縣中小學堂充足始行開辦轉致觀望遲延查袁世凱所奏山東學堂事宜及試辦章程擬先於省城立學堂一區分齋督課先從備齋正齋入手俾初學易於速就漸有師資再行次第推廣其教規課程參酌中西而醇諄於明倫理循禮法尤得成德達材本末兼資之道著政務處即將該督原奏並單開章程通行各省立即仿照舉辦毋許宕延其如何選舉鼓勵之處著遵前旨由政務處會同禮部速行妥議具奏○調蘇元春爲湖北提督夏毓秀爲廣西提督○壬子諭朕欽奉 慈禧端佑康頤昭豫莊誠壽恭欽獻崇熙皇太后懿旨已革端郡王載漪之子溥儀前經降旨立爲大阿哥承繼 穆宗毅皇帝爲嗣宣諭中外慨自上年拳匪之亂肇釁列邦以致 廟社震驚乘輿播越推究變端載漪實爲禍首得罪 列祖列宗既經嚴譴其子豈宜膺儲位之重溥儀亦自知惕息惴惴懇辭廢黜自應更正前命溥儀著撤去大阿哥名號立即出宮加恩賞給入八分公銜俸卹以當差至承嗣 穆宗毅皇帝一節嗣繫甚重應俟選擇元良再降 懿旨以延統緒用昭慎重將此通諭知之○癸丑諭兵丁等借支庫銀應扣本年十二月次

年正月利恩銀兩著卽加恩展限兩箇月○命奕劻裕祿載卓世繼會同前鋒統領閔祺 紫禁城值班  
兵丁獎賞○安徽巡撫王之春緣事開缺調補胡璣爲安徽巡撫以恩壽爲江蘇巡撫陳鵬龍署漕運總  
督○長順奏查吉林省北哈爾濱爲東省鐵路總會之區交涉殷繁光緒二十五年前將軍延茂奏設鐵  
路交涉總局由省派員專辦通省鐵路交涉事宜上年邊疆驟開該局員回省後局房卽付之一炬現在  
路工一律興修該處繁盛過昔華俄各商民趨之若鶩交涉愈多是以俄總副監工茹格維志等前遺其  
代辦達攝爾來省仍以設局爲請並擬有合同十一條經才等逐加斟酌凡有窒礙之處均爲刪改而  
該代辦則以不敢擅專爲詞又風聞哈爾濱附近公司一掃地畝均被侵占當派署吉林分巡道文韜卽  
行前往哈爾濱察看情形並與總副監工會商一切業於本年五月間附片陳明在案茲文韜於八月初  
六日由哈回省將近察看情形並反攔磋商各事稟報數奪前來奴才等查哈爾濱總車站原占地方  
寬八里廣四里約計三十二方里前已咨呈總署有案嗣該站挖濠又拓占不少現時俄總副監工復欲  
占拓地面繪圖劃分界綫約計拓廣至周圍五十餘里經文韜再三辯駁未允退讓設局一事議定於哈  
爾濱仍設總局各段監工處各派專員設立分局均歸總局節制所有局中經費仍照舊章由該公司籌  
給清貼惟前次總局專管鐵路交涉此次該總監工等增改章程凡於關涉鐵路及牽涉鐵路之命盜雜

案及一切交涉事宜無論距哈達近均須歸局經理免致移交地方官會辦轉多遲誤奴才等察覈所定章程尙無窒礙已允其從權辦理第局事如是繁重非有明敏幹練之員不克勝任向來派委該局總會辦必選熟悉交涉之員現既重修舊好局員尤宜慎選此次議派文韞爲總辦花翎分省候補直隸州方明爲會辦查文韞守經達權深識體要方明才識明練曉暢軍機以之分派該局總會辦差使實爲中俄齟齬或能因應咸以第文韞現署吉林分巡道未免常川往彼經理所有總辦事宜卽令方明就近代辦遇有要事隨時飭令文韞前往會商以昭鄭重目下占地一節最關緊要應俟方明至彼面商妥協再立合同以杜將來增占其局中一切經費並俟議定報明立案下外務部知之○丙辰諭軍機大臣等十一月初四日朕恭奉 慈禧端佑康頤昭豫莊誠壽恭欽獻崇熙皇太后由開封啟鑾回京○命編修王同愈馳赴湖北交張之洞差遣委用○戊戌政務處奏據慶親王奕劻等會同禮部奏辛丑壬寅 恩正兩科會試請於明年舉行應請借闕江南各等語查上年劉坤一等奏准辛丑壬寅鄉試 恩正併行會試歸併壬寅年舉行本年舉行鄉試祇有廣東廣西甘肅雲南貴州五省若於明年舉行會試未曾鄉試各省士子不免向隅且舉行經濟特科前經奉 旨定於本屆會試以前殊屬辦理不及擬請展緩至癸卯年舉行較爲允協其單開詳細條目內酌定中額一條現既展於癸卯年會試係在各省舉行鄉試之後



所有中額應仍照章辦理毋庸另議其餘各條暫另片所奏宗室會試編譯會試各省新科舉人覆試各事宜均尙周妥俟奉 旨後咨行禮部存案屆期遵照辦理並將會試改期分咨各該督撫學政出示曉諭俾衆咸知至借闕考試一節查明年補行順天鄉試即須借闕擬借用河南貢院考試地屬毗連較爲合宜請於八月間先考順天河南本省鄉試展於十月間舉行如此變通辦理不至有所窒礙鄉試既借用豫闕次年會試擬亦請仍就河南貢院辦理地居適中於各省公車士子亦便如蒙 俞允應請 飭下禮部將順天鄉試內外場各事宜章程一併妥議請 旨定奪再由該部知照河南巡撫遵辦 上諭政務處遵旨妥議變通鄉會試事宜等語上年劉坤一等奏請將辛丑壬寅鄉試恩正併行會試歸併壬寅年舉行業經允准惟本年舉行鄉試係順天廣西甘肅雲南貴州五省若於明年舉行會試其未經鄉試各省士子不免向隅且經濟特科前經諭令定於本屆會試前考試亦屬辦理不及所有明年會試著展至癸卯年舉行餘著照禮部所議各條辦理至借闕考試一節河南地居適中毗連直隸所有順天鄉試著於明年八月間暫借河南貢院舉行河南本省鄉試著於十月間舉行次年會試仍暫就河南貢院辦理其鄉會試內外場各事宜著禮部一併妥議具奏○諭各省迎鑾各員均著各回原省毋庸送駕又都院堂司各員除有緊要隨扈差使外餘均俟啟轡後七八日分路回京○丁巳政務處禮部奏光緒

二十七年八月初三日奉 上諭各省設立學堂所有延請師長安定教規及學生卒業應如何選舉鼓勵一切詳細章程著政務處咨行各省悉心酌議會同禮部覆核具奏欽此迄今數月除升署直隸總督袁世凱將開辦山東學堂章程奏到外其餘各省均尙未奏覆前據劉坤一張之洞電奏請將學堂各生分別鼓勵明降 諭旨奉 旨著政務處妥議具奏欽此本月十五日復奉 諭旨將袁世凱原奏等單開章程通行各省仿照舉辦著政務處會同禮部將選舉鼓勵章程速行妥議具奏等因欽此等竊維學堂之設固宜宏獎以鼓舞士氣尤貴核實以作育真才不可不優其進取之途亦不可不防其登選之濫卽以東西各國學堂章程而論皆係由小學堂中學堂大學堂以次遞升畢業後始予出身自可按照辦理擬請將各省小學堂畢業學生嚴加考試功課合格者選入中學堂畢業後者取合格再送入大學堂畢業後者取合格准發給憑照作為優等學生由該督撫學政按其功課嚴密考試拔其尤者分別擬取等第咨送京師大學堂覆試候 旨欽定作為舉人貢生仍留下屆應效願應鄉試者聽舉人積有成數由京師大學堂嚴加考試拔其尤者擬取等第咨送禮部奏請 特派大臣考試候 旨欽定作為進士一體 殿試恭候 欽定名次引 見量加 擢用因材器使優予官階不拘庶吉士部屬中書等項成例庶多士觀感奮興爭自濯磨而通才將輩出矣查袁世凱辦法以通省學堂一時未能遍舉先於省

城建立學堂分齋督課其備齋正齋即隸小學堂中學堂之規制意在循序漸進而成效可期現經欽奉 明諭令各省仿造舉辦所有此項肄業各生自應酌照將來選舉章程以示鼓勵擬請俟專齋畢業後即由該督撫學政嚴加考試拔尤擬取等第咨送京師大學堂覆試候 旨欽定作為舉人貢生其取定之人仍俟積有成數由京師大學堂嚴加考試拔尤擬取等第咨送禮部奏請 特派大臣考試候 旨欽定作為進士聽候 殿試錄用其餘未盡事宜應俟各省學堂奏明開辦後隨時酌定請 旨遵行以期仰副 朝廷勸學育才實事求是之至意 上諭政務處會同禮部奏遵 旨核議學堂選舉鼓勵章程一摺學堂之設原以鼓舞士氣作育真才自當優其進取之途尤宜防其登進之濫披閱所擬章程尙屬妥協著照所請飭令各該省將小學堂畢業學生考取功課合格者送入中學堂肄業係俟畢業後考取合格者再送入該省大學堂畢業後取其合格者給照作為優等學生由該省督撫學政按其功課嚴密考校拔尤擬取咨送京師大學堂覆試候 旨欽定作為舉人貢生其貢生仍准下屆應考願應鄉試者聽俟舉人積有成數再由大學堂嚴加考取咨送禮部奏請特派大臣考試候 旨欽定作為進士一體殿試分別等第帶領引見量加擢用不拘庶吉士部屬中書等項成例以廣通材而收實效前據袁世凱奏先於省城建立學堂分齋督課其備齋正齋即遵小學堂中學堂規制業經諭令各省仿照開辦所有此

項學生著俟專齋畢業後卽照此次所擬選舉章程一律辦理以示鼓勵○戊午諭軍機大臣等增祺奏  
奏省需款孔亟擬將錦州大凌河牧廠一律招軍可得銀數十萬兩於目前急需不無裨益馬匹變價及  
草豆節省銀兩解供要差亦可無誤請將該牧廠官丁改爲經制官兵牧地准予弛禁等語所奏尙屬實  
在情形著照所請由該將軍遴委委員詳慎開辦並將未盡事宜酌定章程奏明辦理○己未以李南華  
爲福建汀州鎮總兵○諭劉坤一電奏張春發駐紮清洲訓練得力現在丁憂堅請留營守孝等語張春  
發著准其留營訓練其雲南提督本任照例改爲署理○庚申諭朕欽奉 慈禧端佑康頤昭豫莊誠壽  
恭欽獻崇熙皇太后懿旨英勳奏酌保隨辦議約人員開單奏請獎勵各摺片現在和局已定在事出力  
各員或隨同議約或辦理交涉均屬著有勞勩自應給予獎勵外務部侍郎聯芳著賞戴花翎戶部右侍  
郎那桐著賞加尙書銜內閣侍讀學士張翼著以內閣學士升用直隸布政使周馥著賞加巡撫銜河南  
布政使陳夔龍著賞戴花翎副都統廕昌著賞給頭品頂戴翰林院編修張佩綸著以四五品京堂補用  
前外務部左侍郎徐壽朋之子徐仁輔著以主事用餘著照所請該部知道○諭朕欽奉 慈禧端佑康  
頤昭豫莊誠壽恭欽獻崇熙皇太后懿旨有現在大局漸定回京有期獎勵李鴻章會同妥議轉危爲安榮  
祿俟護使館力主剿辦復能隨事贊匡扶大局王文韶協力同心不避艱險劉坤一張之洞袁世凱共

保東南疆土盡心籌畫均屬卓著勲勞自應同膺懋賞慶親王奕劻著賞食親王雙俸大學士榮祿著賞戴雙眼花翎並加太子太保銜王文韶著賞戴雙眼花翎兩江總督劉坤一著賞加太子太保銜湖廣總督張之洞署直隸總督袁世凱均著賞加太子少保銜已故大學士李鴻章再賜祭一壇伊子李經畬著以三四品京堂候補○辛卯以豫省供支局出力予布政使延祉等獎敘有差○河南河北鎮總兵係顯寅卒予祭葬建祠戰功事蹟交國史館立傳○調孫金彪爲河南河北鎮總兵以吳需爲陝西漢中鎮總兵○是月日本國使臣小村壽太郎回國內田康哉繼之

十一月癸亥朔諭如格陳璧奏監察吏部清釐檔卷完竣並敬呈管見各摺片吏部檔卷現已清釐完竣惟其中繁複者多自應並加刪汰仍著如格陳璧會同吏部堂官督飭司員將實在無用者悉行焚燬其現行常用者改大冊爲小冊併分冊爲總冊分省分衙門連類彙載勿令破碎夾雜總期一目了然統限一年竣事以後仍於月終年終隨時刪修一切檔冊均提存司堂以便檢閱至文選考功兩司各項官冊記載尤多龐雜著責成該管司員一併釐定其月選人數著該部按月於末擬選之先提前張榜曉知既擬選之後印刷敘單卽不投供之教佐等官亦將應選緣由附入敘單每月編表刻冊俾眾咸知經此次申諭之後該堂官等務當認真整頓實事求是毋得稍涉敷衍以肅銓選而杜弊端○諭朕欽奉 慈禧

端佑康頤昭豫莊誠壽恭欽獻崇熙皇太后懿旨宗人府府丞盛宣懷贊襄和議保護東南地方總稅務司赫德隨同商辦和約頗資贊助盛宣懷赫德均著賞加太子少保銜以示獎勵○命三品卿銜張翼以侍郎候補○甲子子河南巡撫松壽陝西巡撫升允尙書銜○乙丑以長庚爲四川成都將軍○內寅上奉 慈禧端佑康頤昭豫莊誠壽恭欽獻崇熙皇太后自開封啟鑾由柳園口渡黃河申初安抵北岸甲正至新店駐蹕○丁卯 上奉 慈禧端佑康頤昭豫莊誠壽恭欽獻崇熙皇太后至延津縣駐蹕○以阿克丹爲鑲藍旗漢軍副都統○命鎮國將軍載瀛第五子名溥儒○己巳 上奉 慈禧端佑康頤昭豫莊誠壽恭欽獻崇熙皇太后至衛輝府駐蹕○庚午 上奉 慈禧端佑康頤昭豫莊誠壽恭欽獻崇熙皇太后至淇縣駐蹕○以柴洪山爲甘肅肅州鎮總兵○辛未 上奉 慈禧端佑康頤昭豫莊誠壽恭欽獻崇熙皇太后至宜溝駐蹕○諭朕欽奉 慈禧端佑康頤昭豫莊誠壽恭欽獻崇熙皇太后懿旨本月初四日自開封啟鑾由柳園渡河天氣清明波平如鏡御舟穩渡萬眾肅歡實賴河神效靈異常順利良深寅感大王將軍諸神自應崇加封號以答神庥著禮部恭擬河干供差各員著松壽查明保獎水手人等著賞給銀二千五百兩○壬申 上奉 慈禧端佑康頤昭豫莊誠壽恭欽獻崇熙皇太后至彰德府駐蹕○癸酉以陳慶龍爲清運總督○甲戌 上奉 慈禧端佑康頤昭豫莊誠壽恭欽獻崇熙

皇太后至直隸磁州駐蹕○調延祉爲河南布政使李紹芬爲山西布政使以夏時爲陝西布政使調陳  
埔爲四川按察使以吳廷斌爲山西按察使○乙亥 上奉 慈禧端佑康頤昭豫莊誠壽恭欽獻崇熙  
皇太后至邯鄲縣駐蹕○諭軍機大臣等據奕劻王文韶電奏稱公約第六款內載明由國家出給保票  
付與各款每月給銀行董事收存等語應將每年應付本息勻照十二分按月攤付先期交上海道轉付  
收存無論如何爲難不得稍有遲誤○以瑞良爲外務部左丞顧肇新爲外務部右丞陳名侃爲外務部  
左參議紹昌爲外務部右參議○奕劻奏據內外城紳董大理寺卿王福祥等二百七十五員名呈稱去  
年外國聯軍入京士民倉猝遇變大荆地棘九死一生故相李鴻章航海北來道途水陸所經皆敵軍佔  
領之地動遭檢制措手無方既至如陷重圍故相不辭勞瘁掉三寸筆舌以與七八強國數萬勝兵相持  
鏖歷歲時千辛萬苦卒能使聯軍撤退地面交還 宮 廟再安市廛復舊此皆由中國兩全權大臣和  
衷共濟相與有成福祥等與士民商旅仰託幘幘實有起死回生之慶故相又飭開市肆以通有無運銀  
米以資流轉督飭中外兵丁諸姦除暴聯絡中外官商施粥散米片言禁誡中外帖然一令頒行奔走恐  
後故慮破巢之下竟忘毀室之憂今故相告終長城速壞福祥等從危急存亡之日受勞來旋定之恩各  
懷詩人終不可誼之感 懿旨飭令原籍及立功省分建立專祠伏食京城內外無漢大臣祠宇良由漢

大臣原籍既不在京京師又非立功之地是以故事無有惟去年之亂爲我朝二百餘年未有之變全機大臣持危定難恢復京輦亦我朝二百餘年未見之功故相以勞定國以死勤事又始終不離京城自非尋常勳績可與比例不揣冒昧籲懇奏請逾格恩施准於京師地面建立該故相專祠列入祀典春秋官爲致祭都人士女亦得歲時馨香俎豆稍答再造之恩實於盛朝酬庸報功激勵忠勤之愷澤不無裨補等情聯名呈請具奏前來臣等伏查故大學士李鴻章遠逝之後朝廷飾終典禮度越尋常懿旨稱該大學士忠誠堅忍力任其難宗社復安朝野攸賴實已洞鑒忱惻此次和議幸成臣與該大學士共事既久深敬其體國之忠任事之勇該紳等呈稱向來漢大臣無立功京城故事此次該大學士功在京師實從前所未有合無仰懇逾格恩施可否准在京城建立已故大學士李鴻章專祠列入祀典春秋由官致祭以順輿情而降報享之處伏候皇太后皇上聖鑒訓示祇遵上諭朕欽奉慈禧端佑康頤昭豫莊誠壽恭欽獻崇熙皇太后懿旨奕劻等奏據呈請爲已故大學士功德在民懇建專祠一摺已故大學士李鴻章服官中外四十餘年懋建殊勳安定疆宇前經迭降恩旨優予飾終已准於原籍及立功省分建立專祠以彰勞勩茲據奏請各節京師建立專祠漢大臣向無此曠典惟該大學士功績邁常自宜逾格加恩以示優異李鴻章著准於京師建立專祠列入祀典由地方官春秋致



祭以順輿情而隆報享用示篤念盡臣至意○丙子 上奉 慈禧端佑康頤昭豫莊誠壽恭欽獻崇熙

皇太后至臨洛關駐蹕○丁丑 上奉 慈禧端佑康頤昭豫莊誠壽恭欽獻崇熙皇太后至順德府駐

蹕○己卯 上奉 慈禧端佑康頤昭豫莊誠壽恭欽獻崇熙皇太后至內邱縣駐蹕○諭奕劻王文韶

電奏據崧蕃電稱平羅縣屬上營子地方突有匪徒多人焚擄鄉民搶掠教堂傷及梅教士並教民數人

已飭派隊保護並電山西巡撫分途兜拿等語各省教堂教士朝廷一視同仁迭經嚴降諭旨飭令實力

保護不准稍有疎虞乃該地方官奉行不力至有毆傷教士教民情事實堪痛恨著崧蕃先將疎防營縣

據實嚴參並會同岑春煊迅飭派出隊伍勒限懸賞將凶犯悉數擒拿務獲懲辦毋稍漏網以肅法紀而

篤邦交○庚辰 上奉 慈禧端佑康頤昭豫莊誠壽恭欽獻崇熙皇太后至柏鄉縣駐蹕○諭軍機大

臣等呂海寰奏出洋肄業學生宜防偏重以杜流弊一摺學生出洋肄業原為儲才起見豈容濫竽充數

若如所奏近來學生出洋沾染習氣流弊滋多殊非慎重名器之意著外務部按照所陳防弊及考課保

送各節詳晰妥議並將該大臣原奏分咨出使各國大臣核議具奏請旨辦理原摺著鈔給閱看將此諭

令知之○諭軍機大臣等慶親王等奏督豫鐵路礦務請飭開辦以保利權一摺山西河南鐵路礦務亟

宜早自開辦著岑春煊錫良遴選殷實公正紳商迅速定章督飭妥為籌辦以免利權旁落原摺著鈔給

聞將此諭令知之○諭甘肅平羅縣屬上營子地方匪徒焚掠鄉民並傷及教堂教士一案昨已有旨嚴飭該督會同岑春煊迅速拿辦並令先將該管營縣嚴參茲據崧蕃奏查明疏防各官請旨懲處各節鈞署平羅縣知縣李含英平羅營參將易慶安著一併先行革職勒限將此案匪徒悉數擒獲盡法懲辦如逾限不獲即將該員等永不敘用該督務當督飭文武各官認真搜捕早日了結並將各屬教堂教士教民加意保護毋再疏虞致干咎戾○諭據奏勸等奏英美兩國使臣請將張蔭桓開復等語已故戶部左侍郎張蔭桓著加恩開復原官以昭睦誼○諭徐會澂陳維泰察看工藝局情形據實覆陳一摺前據直隸布政使周馥代奏已革翰林院侍讀學士黃思永擬就京師外城琉璃廠議倉收養遊民設立工藝局招股創辦當交該兼尹等酌議具奏茲據復陳各節京師遊民甚多以教工為收養實於生計有益著照所擬在京師內城外城各設工藝局一區招集公正紳士妥籌創辦由順天府尹督率鼓勵切實舉行朝廷創立工藝局意在教民不同計利該兼尹等自當加意考察使工有所勸民有所養方副國家實事求是之意至黃思永請招股設局應不准行仍著將備荒議倉認真經理以惠窮黎餘著照所請辦理

○辛巳 上奉 慈禧端佑康頤昭豫莊誠壽恭欽獻崇熙皇太后至趙州駐蹕○壬午 上奉 慈禧

端佑康頤昭豫莊誠壽恭欽獻崇熙皇太后至樂城縣駐蹕○諭甘肅平羅縣屬殺傷教士教民一案業

總諭令將該管地方官革職帶罪勒限嚴拿匪徒務獲懲辦茲據松番電奏探聞梅教士及教民等四人已因傷身死現在添派道員張廷祺前往會營督緝凶犯並妥爲保護等情地方文武官員皆有保護教堂教士之責似此防範不力致教士等因傷斃命朝廷深爲矜憫著松番立即妥爲撫卹並將此案凶犯趕緊拿獲卽行正法該管官員王樹槐李含英易慶安業經降旨革職如再不獲犯著卽照前旨永不敘用○癸未 上奉 慈禧端佑康頤昭豫莊誠壽恭欽獻崇熙皇太后至正定府駐蹕○甲申諭朕欽奉

慈禧端佑康頤昭豫莊誠壽恭欽獻崇熙皇太后懿旨上年京師之變竊賊內訌激成大事震驚九廟國步跼危皇帝奉予西狩始念所不及此創鉅痛深蓋無時不引咎自責幸賴轉旋大局 宗社復安此皆仰仗 列祖靈應渥荷 上蒼眷佑得以挽回厄運保此丕基茲者乘輿遍返七轡依然欽懷之餘彌增悚懼懲前毖後惟望恐懼修省庶幾克篤前烈以敬迓 天庥若復微幸圖存宴安逸豫尙安有興邦之一日比雖時局粗定而畿輔黎庶屢遭蹂躪僅有子遺秦晉一帶時苦旱災東南則江皖數省皆被水患憫念吾民瘡痍滿目值此國用空虛籌款迫切何一非萬姓脂膏斷不忍厚斂繁徵剝削元氣自應薄於自奉一切當以崇儉爲先除 壇廟各處要工已飭敷實估修外其餘可省及應裁之處皆應力杜虛糜至於聯固邦交修明內政舉凡利所當興弊所當革我君臣上下務在同心協力切實講求次第

舉行認真整頓庶幾交相咨誠安不忘危永矢憂勤惕厲之忱痛除粉飾因循之習實事求是同濟艱難無怠無荒願中外大小臣工與朝廷共勉之○諭朕欽奉 慈禧端佑康頤昭豫莊誠壽恭欽獻崇熙皇太后懿旨國家與各友邦講信修睦樂敦聯歡現在回鑾京師各國駐京公使亟應早行覲見以篤邦交而重使事俟擇日後皇帝於乾清宮覲見各國公使其各國公使夫人從前入謁內廷極稱欵洽予甚嘉之現擬另期於寶壽宮覲見公使夫人用昭睦誼著外務部卽行擇定日期一併恭錄照會辦理○諭自上年拳匪內訌開釁各國京師紛擾 宗社震驚國勢岌岌間不容髮朕恭奉 聖母皇太后西幸長安備極艱苦倉皇播越創鉅痛深滋 列聖之怨恫貽 慈躬之憂悴皆由朕用人不當以致變出非常幸賴 累朝厚澤深仁仰荷 昊蒼眷佑斡旋大局得以轉危爲安此 列祖 列宗在天之靈式延休命予小子所當寅承惕息慈惠不忘者也茲值鑾輿迴返行抵畿疆痛定思痛曷勝寅感本月二十八日回宮後朕是日卽恭詣 奉先殿 壽皇殿敬謹行禮次日恭詣 大高殿 太廟祇謁告祭擇日恭詣 闕丘 社稷壇祇謁告祭同日遣官告祭 方澤朝日夕月各壇恭代行禮並遣官擇日告祭 東陵西陵恭代行禮用伸歉悚而展明禋各該衙門謹敬預備○諭朕欽奉 慈禧端佑康頤昭豫莊誠壽恭欽獻崇熙皇太后懿旨鑾輿播越倏忽一載有餘當時禍亂猝乘倉皇西幸非常之變至今實用痛心每

念 宗社驚危 山陵震駭歲時祭謁廢缺不修循省多愆曷勝疚悚茲幸安抵京師克循舊物理宜虔  
伸祀事肅展微忱除 太廟 園丘各 壇 殿皇帝已定期告祭外 東陵 西陵理應親行恭謁以  
昭妥佑而達明禱著於來歲之春敬謹諏吉予率皇帝祇謁 東陵所有由京啟鑾及御道行宮一併均  
著加意簡省王公各官除每日值班及從行人員外其餘均毋庸隨扈我朝謁 陵大典而外如行圍閱  
伍以及巡幸各行省臨視河工海塘諸役 列聖皆乘時順動常著勤勞與古昔帝王巡狩省方觀民敷  
教之意正相脗合況現值時局艱難尤宜不憚辛勩躬覽萬方用知庶務嗣後亟應恪遵 家法勸舉時  
巡惟須輕輿減從不致勞民傷財方稱朝廷實事求是之本有若如此次回鑾車馬猶覺繁多供億亦復  
浩大其應如何斟酌變通破除常格務使輕而易舉之處著御前大臣軍機大臣遵卽會同悉心覈議具  
奏請旨遵行○乙酉諭前據劉坤一等會奏賠款數鉅籌辦甚艱約計洋稅加足值百抽五並洋煙酒食  
物一律收稅加以常關歸洋關徵稅約共增銀四百五十萬兩再加漕折百萬共五百五十萬兩按照戶  
部奏派賠款約有三成請減三成籌解等語當經照准原以半年籌解可資騰挪茲據奕劻等奏賠款仍  
應按照公約每月籌解足數自不能核減三成著仍照部撥十成原數按月解滙不得諉延致滋口實○  
諭平羅縣屬教案業經迭降諭旨嚴飭速辦茲據松藩續奏彭教士復因傷斃命現已捕獲兇犯四名等

語著崇藩仍遵前旨將該教士妥爲撫卹所獲兇犯審實卽行正法其餘各犯仍趕緊督飭嚴拿務獲懲辦○丙戌 上奉 慈禧端佑康頤昭豫莊誠壽恭欽獻崇熙皇太后山正定府御火車至保定省城駐蹕○丁亥諭呂海寰奏捐輸開闢太重宜變通辦理一摺去歲以來畿輔蹂躪特甚各省亦多水旱之災小民困苦流離朝廷憫念前已明降諭旨斷不忍厚斂繁徵剝削元氣茲據該左都御史所奏各節著各該督撫各就地方情形悉心體察將如何籌捐之法明白曉示嚴禁紳董吏役朦混中飽藉端需索務除壟斷以通上下之情總之於籌款之中必以恤民爲主不准稍涉苛刻擾累閭閻以副朕視民如傷之至意將此通諭知之○諭昨已有旨二十八日回宮後本日卽恭詣 奉先殿 祈皇殿行禮次日祇謁 大高殿 太廟告祭擇日祇謁 社稷告祭更遣官告祭 方澤 朝日 夕月各壇及 東 西 陵等處此次表文自應實沈痛以伸歎悚之誠著該衙門迅卽恭撰進呈御覽其祭日服色禮節並著禮部分別妥議先期電奏○戊子諭原任戶部尚書山兵部尚書徐用儀吏部侍郎許景澄內閣學士聯元太常寺卿袁昶該故員子嗣幾人有無官職著禮部迅卽咨行內務府鑲紅旗滿洲浙江巡撫查明申報○己丑諭都察院左都御史呂海寰奏各省屏捐以捐宜變通辦理一摺著各該督撫各就地方情形悉心體察將如何籌捐辦法明白曉示嚴禁紳董吏役朦混中飽藉端需索務除壟斷以通上下之情

總之於籌措之中必以恤民爲主不准稍涉苛虐撥以副朕視民如傷之至意將此通諭知之○  
庚寅 上奉 慈禧端佑康頤昭豫莊誠壽恭欽獻崇熙皇太后由保定府御火車至馬家堡午刻乘輿  
入永定門正陽門未刻還宮○上詣 奉先殿 壽皇殿行禮○載漪奏准戶部咨開具奏新定賠款  
數鉅期迫亟宜合力通籌分派攤還以期無誤大局一摺於光緒二十七年八月十六日奉 旨依議欽  
此恭錄原摺咨行到蘇計約款內開一地丁收錢酌提盈餘剔除中飽山東已奏准辦理行咨各省仿照  
切實遵辦等因欽遵轉行去後茲據蘇州布政使陸元鼎詳稱償款爲和局所關非空言所能搪塞亦非  
零星所能湊集於無可設法之中爲萬不得已之計擇其累民稍輕而得大宗進項不致無著又與地丁  
收錢酌提盈餘部議脗合者計惟有規復地漕銀價將盈餘歸公之一策據蘇省徵收地漕等銀每兩折  
收錢二千二百文民間習久相安自光緒二十二年起因銀價驟落奏明減收錢二百文每兩祇收錢二  
千文其中並無盈餘可提當日地方平靜宜恤民隱現值時事多艱普天臣民方共抱毀家之念擬於蘇  
屬三十五州縣徵收銀價自明年上忙起不分地漕清賦蘆課屯折雜項每兩仍折收錢二千二百文由  
經徵之員提出二百文照市易錢解司專款存儲以中稔之年通屬徵錢二百餘萬兩計之可得錢四十  
餘萬串約合銀三十萬兩所徵之錢散在大衆增之無礙生計而公家則盛獲鉅資濟還賠款不無小補

等情詳請具奏前來臣等伏思理財之法創不如因名目新增動滋口實輸將有素自曷樂從蘇省地價銀價光緒二十一年以前每兩原收錢二千二百文至二十二年始減爲每兩徵收錢二千文現在議增之二百卽係規復所減之二百各花戶食毛踐土具有天良事仍舊與無慮爲難擬俟奉旨後卽行通飭各屬先期曉諭自光緒二十八年上忙開徵爲始一律遵辦倘將來銀價漲落懸殊再隨時察看情形分別核實酌定以昭公允得旨知道了仍舊隨時察看情形分別核實辦理○壬辰欽奉慈恩端佑康頤昭豫莊誠壽恭欽獻崇熙皇太后懿旨上年京師之變倉猝之中珍妃應從不及卽於宮內靖難洵屬節烈可嘉加恩著追贈貴妃位號以示優恤該衙門知道○諭直隸提督馬玉崑加恩著賞加太子少保銜並在紫禁城內騎馬